



ЖАҲОН КЛАССИК  
АДАБИЁТИДАН

Мольер



БЕШ ПАРДАЛИ КОМЕДИЯ

ОЙБЕК таржимаси.

ВОҚЕАДА ИШТИРОК ЭТУВЧИ ШАХСЛАР

Оргон

Пернель хоним — унинг онаси

Эльмира — унинг рафиқаси

Дамис — унинг ўғли

Мариана — унинг қизи

Валер — Мариананинг севган ёш йигит

Клеант — Эльмиранинг биродари

Тартюф — авлиё

Дорина — Мариананинг хизматкори

Лояль жаноб — суд пристави

Офицер — полис

Флипота — Пернель хонимнинг хизматкори.

Воқеа Парижда, Оргон уйида бўлиб ўтади.

\*

Устоз Мусо Ойбек қаламига мансуб бу таржима архивдаги талай оригинал ва таржималардан бири. Етук таржима нусхаси «Тартюф» бир вақт Ҳамза номидаги академик драмтеатр саҳнасида кўйилганлигини эсласак, эҳтимол, бу таржиманинг саҳна вариантидир, деб ҳам қоламиз. Лекин, Ойбек томонидан оқка кўчирилган нусхаси театр архивидан ҳам излаб топилмади. Мусо Ойбек сўз хазинасининг бойлиги, ҳалқ ибораларининг саҳий ишлатилиши таржиманинг биринчи бетиданоқ билиниб турибди. Балки бу эркин, сарбастроқ таржимадир. Йирик адид қалам меҳнати аён бу асар ҳам журналхонларга манзур бўлар деган умиддамиз.

Зарифа САЙДНОСИРОВА,  
адибнинг рафиқаси.

## Биринчи акт

### I САҲНА

Пे́рнель хоним, Эльмира, Дамис, Мариана, Клеант,  
Дорина ва Флипота.

Пе́рнель хоним

(Флипотага)

Қани тез юр! Гуноҳдаи қоча-қоч нари...

Эльмира

Тўхтанг, ахир, онажон... Халлослаб қолдик...

Пе́рнель хоним

Эътибор бериш керак эди олдинроқ,  
Сизга ялинмасам ҳам эшикни топгўм.

Эльмира

Сизга эътибор, иззат бизнинг қарзу фарз,  
Бироқ нечун шошасиз, тушунолмайман...

Пе́рнель хоним

Тоқатим йўқ! Ана шу ҳангомаларни  
Кўриш менга оғирдир! Она бўлганим  
Туфайлидан ҳаққим бор — керак айтмоғим.  
Мен бу ишдан жуда, жуда норози.  
Ўйлаб кўринг ахир бу қандай оила?  
Хеч кимда на қўрқув бор, на-да эҳтиром:  
Қайси бирига боқсанг, ўз муҳокама,  
Ўз қарашини илгари суради мудом...  
Айтинг менга: мен қайдা, қайси водийда?  
Бозордами? Лўлилар кўчида ёки?  
Билмайман...  
Христиан уйида эмаслигим муқаррар!

Дорина

А мен...

Пе́рнель хоним

Сенми — энанг айлангур, хизматкор, чўри:  
Гапга аралашмаган сен қолганмидинг?  
Сендадир тилнинг ҳаддан ошиқ узуни, —  
Менга аёнки, бунда сендан умуман  
Кўп нарса дов қилмаслар...

Дамис

Аммо...

Пе́рнель хоним

Сен бир аблаҳ! Ҳаммага кўпдан маълум-ку,  
Отанг сендан кўрмади асло ҳаловат,  
Уятга қолди, дарди кўпайди фақат:  
Ҳамма вақт ёдингда тут: ҳал этилган бу.

**Мариана**

Мен ўйлайман...

**Пернель хоним**

Мана бу қўйдай беозор!  
Мана чинакам содда, губорсиз сийна!  
Юмалоқ-ёстиқ қилиб сўзлашдан қўрқар...  
Лекин писимиқда гап кўп, сен биларсан-а?

**Эльмира**

Лекин, онажон...

**Пернель хоним**

Сизга яширмай айтай —  
Майли жаҳлингиз чиқсин, ёки чиқмасин,  
Ўгай она, завжага, уй бекасига  
Ярашмас енгил қилиқ...  
Эсни йўқотиб, ажва бўлгандан кўра —  
Сиз ақли салим билан, бошқаларга ҳам  
Тимсол бўлишингизни истардик ҳардам:  
Эрга ёқиши-чун ҳожат йўқ безанишга.

**Клеант**

Хоним афанди! Менга рухсат этгайсиз...

**Пернель хоним**

Аҳ, бегим, сизни жуда ҳурмат қиласмен,  
Мен бу ерда хўжайн бўлсам, билмаймен,  
Бу эшикка бош суқа олармидингиз!  
Ҳаётга қай кўз билан қарашингизни,  
Баъзи вақтларда сиздан мен эшитамен,  
Мен худди жаҳаннамга тушган бўламен!  
Бу гаплар учун ҳаргиз койинманг мендан.  
Қўнгилдагини киши вайсайди баъзан...

**Дамис**

Аммо сизнинг Тартюф...

**Пернель хоним**

Мумтоз ва тимсол  
Бўлувчи гўзал инсон! Унга қарши сен  
Боши магизсиз бўлган, бир маҳмадана,  
Менинг бутун ғазабим жўш ураг дарҳол!

**Дамис**

Демак, Сизча, мен унга ҳар вақт индамай,  
Ва нима деса, шуни лом-мим демасдан —  
Муқаддас ҳақиқат деб қабул ҳам этай?  
Йўқ, ташаккур этаман бош эгиб тубан.

**Дорина**

Ҳамма нарсада унга бўйсунсанг агар,  
Бирон ишни ишлашга ботинолмаймен!  
Хеч нимани кўзидан қочирмайди у,  
Яна ҳар бир ишни ҳам ёқтирумайди у:  
Бу гуноҳ, бу — уят...  
Бу динга заرار... Бошинг ганг бўлади-да  
Хеч нима қилолмайсан!

### Пернель хоним

Майли текширсин, майли! Ҳар бир одимни  
Кўзда тутсин! Тафтиши — биз учун нажот!  
Ўғлим бир оз забардаст бўлсайди, уят.  
Ҳурмат, севигига сизни мажбур қиласарди.

### Дамис

Йўқ, буви!  
Бу беҳуда заҳмат бўларди бутун:  
Бирорларнинг фойдаси, ишваси учун,  
Мен мунофиқ бўлишни ҳеч истамайман!  
Агар у мени яна бирон мартаба  
Койиса, нетса, у чоқ — мен ишонамен —  
Яхшилик билан битмас иш натижада!

### Дорина

Алам қиласиди: беном-бенишон, саёқ  
Кутилмагандага уйга кирди бесўроқ;  
Худодай қаршиладик, кийим-кечак бут,  
Қорни тўқ: гадой учун бу ўзи давлат!  
Яна нима? Ҳомийлар ҳаққига фақат  
Тангрига ибодат қил — бошқасин унунт!  
Йўқ! У исқиртни энди қил бир томоша!  
Ҳамма унга қул, ёлғиз у ҳукмфармо.

### Пернель хоним

Нетайлик! Дин аҳлини ҳурмат қилмайин,  
Биз гуноҳга чуқурроқ ботдик кун сайин!

### Дорина

Унинг каби виждонсиз, энг сохталарга?  
Унда тақводорлик йўқ, динчилик парда!

### Пернель хоним

Тилинг қурсин, тилинг!

### Дорина

Нима бўлибди, асло —  
Икки юзлик қилмай, мен дангал айтай:  
Мен ишонмайман унга, ишонч йўқ қитдай:  
Мен уни анча-мунча таниб олганман!

### Пернель хоним

Таниганман дейсанми? Таниб қолгансан!  
Бизнинг одатимиздир ҳақ йўлдан қочиш —  
Ҳақиқатни тинглашини ҳар кимса орзу  
Қиласермайди... Унинг дарди ёлғиз шу:  
Адашганларни нажот йўлига тортиш,

### Дорина

Хўб, шундай бўлсин... Фақат нима сабабдан,  
Бизнинг уйга меҳмонлар келса, дарров у  
Қовоқларини солиб, кўтарар шов-шув, —  
Меҳмонлар ёш эркаклар бўлса, хусусан?  
Бу ерда ёт киши йўқ... Хўб, айта қолай...

(Эльмирани ишорат қиласы.)  
Ишонингки, бекага кунчилик қиласы!

### Пернель хоним

Юм оғзингни! Юм! Ортиқ битди тоқатим...  
Ахир ёлғиз ундами шу фикр ҳоким?  
Атрофда нималарни дерлар, қулоқ сол...  
Лутф этинг, ҳамма учун уй очиқ яққол!  
Меҳмон устига меҳмон — арава ҳадсиз!..  
Мен бирон ёмон ишдан қилмаймен гумон —  
Лекин шу ҳақда гап-сўз юриши ёмон.

### Клеант

Сўзфурушларни қандай жим қилмоқчисиз?  
Уларга ёқиши учун дўстлардан жудо  
Бўлмоқ, алоқа узмоқ мумкинмас ҳаргиз!  
Бу иш тамом фойдасиз бўларди ҳатто.  
Пучак пулга арзимас гийбат «миш-миш»ни  
Босиши учун, менимча, ўқидир бир чора,  
Яхшиси шу — биз қандай яшаган бўлсак,  
Шу хилда яна қураверсак турмушни:  
Улар сўзни чуватаверсин тобора.

### Дорина

Сўз чуватувчилар ким? Улар шундайлар:  
Ўз-ўзидан ҳадиксираган яна, яна.  
Кимнинг ахлоқи чиндан қабиҳ-кир эса:  
Улардан гийбат пар-пар учиб келади —  
Тилни ишга солишга бас!  
Сизни жуда синчиклаб текширадилар.  
Тушга кирмагани ҳам ёпиширадилар,  
Шундай ўйладиларки, ўзлари соп-со!

### Пернель хоним

Тўғри эмас, Мопарда хонимлар ҳам бор...

### Дорина

Уларни ҳам биламан...  
Уларнинг ҳаёти барчага тимсол...  
Нечун? Билмоқ истарсиз буни эҳтимол?  
Гуноҳларга ёшлари ўзган бир қадар!  
Улар қартайганлар-да, ҳусн ҳам сўлган...  
Дунё унутган, энди улар чиллада...  
Баъзиси ҳеч нимадан тоймаган бир чоқ —  
Бугун эса ёнига йўлатмас сира:  
Шафқат кўрмай тақводор... Қелар ҳаваси!  
Атрофда ўйин-кулгу, у боёқиши хурсанд  
Бўлар эди-ку, лекин чиқитга чиққан:  
Истеъфо берган! Танг боёқиши аҳволи...

### Пернель хоним

(Эльмирага)

Мана шундай bemаза ҳангома билан  
Сиз кўнгил очасизми, азиз келиним?  
Биз боёқишиларга энди гап йўқми чиндан?

Ҳар ҳолда мен айтишим керак ўз фикрим!  
 Ышуни билинг-ки, ўғлим, яхши иш қилди,  
 Машҳур бир зотга уйдан у берди макон,  
 У зотга қарши сизда ғазаб ва нафрат,  
 Сизга талқин этибди буларни шайтон.  
 У — азиз одам, унинг кўнгли мусаффо, —  
 Лекин атрофга боқиб у нима кўрар,  
 Нима эшитар! Қандай маразлар туяр!  
 Айвои йигинлар... ҳар хил бемаъни кайф-сафо...  
 Базмлар, зиёфатлар... меҳмон кутишлар,  
 Туну кун шу! Улфатлар? Суҳбат тузишлар?  
 На тақво, на камтарлик — йўқдир чин инсон...  
 Ҳамма оғизда ёлғиз бўш бир ҳангома,  
 Биронта қудси гап йўқ... Ахир бу нима!  
 Яъжуж-маъжуж босгани? Бу қандай сурон?

(Клеантни кўрсатади.)

Мана, мана! Кулишга ҳалитдан тайёр!  
 Ҳа, мен унга эмасман подон занфа,  
 Мени масҳаралашни қиссин ихтиёр...  
 Мирзам, дуч келмагансиз ундайига!

(Эльмирага)

Хайр, азизим, эс-ҳушни йигиб олсангиз,  
 Ишларингиз яхши саранжом топар, —  
 Мен у вақт келурмен... Олдин кутмангиз.

(Флипотага шапалоқ уради.)

Қани, ҳай ҳафтифаҳм! Олға лўкилла!

## II САҲНА

Клеант ҳам Дорина

Клеант

Ҳеч кимни ўқситмади — ҳаммани текис  
 Қийратди... У забардаст кампир!

Дорина

Ай-яй-яй!

Сизнинг хушомад учун кампир ҳеч қандай  
 Раҳмат демас эди.  
 Кампир дедингизми? Ҳеч қачон!  
 Минг йил ўтса-да, билинг ёш — жувон!

Клеант

Рост, у қайнаб оқди,  
 Хўш, кампирга Тартюфнинг нимаси ёқди?

Дорина

У нима ҳали! Мана жаноби Оргон,  
 У чиндан Тартюфга кўнглини қўйган:  
 Анқо тухуми каби нодир воқеа —  
 Тушунмайман бу ишни мен ўзим сира...  
 Шундай таърифлаш мумкин: Тартюф у учун  
 Бола, хотин, онадан азиздир бутун!  
 Тартюф шуни хоҳлайди, шуни буюрур...  
 Тартюф хафадир... Тартюф кўнмас бир умр.

Тартюф ухлар — ғинг дема! У овқатланар,  
 Тартюф ошаб бўлгунча ҳамманг оч ўтири!  
 Нима деса ва қилса, албат мўътабар  
 Ва биздек аҳмоқларга бўлармиш сабоқ...  
 Бу гапларнинг барин билар албатта,  
 — У қиласкермайди ҳар ишни таъна:  
 Қай вақт дўқ қиласкан бўлар, қай вақт — бол билан  
 Андавалар; қарабсан ҳеч сездирмасдан  
 У бирмунча пулени ишлар лаҳзада...  
 Ҳаммадан безакларга у қаттиқ душман:  
 Гулми, уқами — майли, кўзига — бало!  
 Юлади, ташлайди... Баъзи вақт ҳатто  
 Сал дуруст кийиндикми — бўлмайди ҳурсанд!  
 Жанобларми, хизматчими, бари бир унга..

**III САҲНА**

*Клеант, Дорина, Эльмира, Дамис ва Мариана.*

**Эльмира**

*(Клеантга)*

Сен баҳтли экансан-ки бормадинг, яна  
 Қоп-қоп гап эшидик биз бечоралар.  
 Мен у ерда Оргонни кўрдим; юқори  
 Чиқайин — яхши эди у дуч келмаса...

**Клеант**

Сен боравер. Бу ерда биз гаплашамиз,

**IV САҲНА**

*Клеант, Дорина ва Дамис.*

**Дамис**

Синглим ишини билиш керак эди, тоғажон!  
 Сезаман, Тартюф бирон ўй билан машғул.  
 Бу никоҳни ёқтирмас, қиласман гумон...  
 Нима қилишни билмай ўзим ҳам ҳайрон...

**Дорина**

Тисс.. Келаётир!

**V САҲНА**

*Клеант, Дорина ва Оргон.*

**Оргон**

Э, салом, биродар...

**Клеант**

Бардамисан! Хўш, сафар  
 Яхши бўлдими? Соҳми қишлоқда?  
 Гарчи ҳурсандчилик йўқдир у ёқда...

**Оргон**

Дорина...

*(Клеантга)*

Кечир. Мен билмоқчиман бизда қандайин  
 Янгиликлар бор экан... Бир минут, бирпас!

Икки кун бўлмадим-а, ҳазил гап эмас...  
Сабр эт бир оз!

(Доринага)

Тинглайман. Сени муфассал  
Айтавер бирин-бирин...

Д о р и н а

Даставвал

Хотинингиз оғриди қаттиқ.  
Титраб қақшади, ёнди... кучли бош оғриқ...

О р г о н

Хўш, Тартюф қалай?

Д о р и н а

Тартюф? Уни сўрамоқ ҳам беҳуда...  
Кимда бор унинг бунда кўрган ҳузури!

О р г о н

Боёқиши!

Д о р и н а

Бекамиз оғриб  
Кечки таомга базўр ўтира билди,  
Бошим, деди-да, таом тотмади асло.

О р г о н

Хўш, Тартюф қалай?

Д о р и н а

Икки каклик ошади —  
Ҳа, сур гўштдан ҳам оз-моз тотди... у аммо  
Тўйганидан, ўзи кўп хоҳламади.

О р г о н

Боёқиши!

Д о р и н а

Тун ўтди зўр таҳликада!  
Уйқу йўқ, ёнди, киприк қоқмадик биз ҳам!  
Кўп қийналдик, юришга дармон йўқ сира...  
Тонггача силжимадик касалдан бир дам!

О р г о н

Хўш, Тартюф қалай!

Д о р и н а

Бегам, беташвиш, тўйиб,  
Дастурхондан қўзғалди оҳиста, шошмай,  
Сўнг ташланди тўшакка ва хуррак қўйиб  
Бутун кеча ухлади... У қотди тошдай!

О р г о н

Боёқиши!

Д о р и н а

Аллақачон қон олиш керакди, лекин

Истамади. Хонимни босди зўр даҳшат!  
Қон олишга ўзи ҳам кўнди, ниҳоят —  
Ҳаммамизга ташаккур билдириди кейин...

### Оргон

Хўш, Тартюф қалай?

### Дорина

Тартюф билдики, хаста  
Қон олдирганида кўп қувват йўқотди.  
У дарров ўз бўғзини тўлдириди яна!  
Нонуштада у нақ беш қадаҳ шаробни  
Том ихлос билан ортиқ томоққа отди!

### Оргон

Боёқиши!

### Дорина

Аммо келишингизга дард ариди бекадан...  
Бориб айтайнинки мен:  
Меҳрибону лутфкор эрингиз бизга  
Софайганингиз учун билдириди шодлик!

### VI САҲНА

Клеант ва Оргон.

### Клеант

У сени мазах қилар кўзинг олдида,  
Дангал қилиб айтайнин, унинг ҳаққи бор!  
Мумкинми-ки ўзини киши шу хилда  
Ўжарчасига алдар? Азиз дўст, сира,  
Аччиғланма; сен каби улуғвор инсон  
Жилла фозил бўлмаган битта шахс учун  
Ўзни, оиласини, барчани бутун  
Унутсин, — бундай гапни биларми замон!  
Ўзинг инсоф қил...

### Оргон

Тўхта, қизишма чандон.  
Сен беҳуда сўзлайсан, ўзинг билмаган  
Бир шахс устида мунча лоф-қоғ недан?..

### Клеант

Билмайманми, эҳтимол, ўрганиб ҳамда  
У ҳақда тўғри фикр олишим мумкин...

### Оргон

Майли, ўрган! Тайёрмен лекин қасамга,  
Ки сен уни севасан, бўласен мафтун!  
Мана инсон! Оҳ, қандай ажойиб инсон!  
У шундай бир инсонки, мундай бир ҳазрат...  
Қўй, хуллас чин инсон! Бундай азамат  
Улуғликни топмасмиз бизлар ҳеч қачон.  
Унга эргашган — руҳий оламга учар,  
Одамзод авлодига, унга беҳуда  
Икир-чикир ҳаваси, армон-орзуга  
Маънавий оламдан менсимай боқар...

Мени ол: мен ўзгардим, мен бошқачаман.  
 Нозик туйғулар учун руҳим күр ва кар.  
 Оёқларим остида ҳозир ўл, сенмас —  
 Бутун оила ўлсин — солмаймен назар:  
 Уруғларимга, барча дўст-ёрга ҳатто  
 Бўлган қиттак севги ҳам менда йўқ ҳозир.

### Қ л е а н т

Инсонча иш бўлибди!

### О р г о н

Тартюфга йўлиққаним тушди ёдимга:  
 У бизнинг бутхонага қатнаб юрарди...  
 Мен дарров кўз остига уни олдим-да,  
 Ундан бўён ҳамиша кўзларим зорди.  
 У мендан бир оз нари,  
 Ибодат тугагунча тиз чўкиб, ҳалим,  
 Намоз ўқирди — гоҳи мунис диққатли,  
 Гоҳ қудси ўт юзида мавжланарди жим.  
 Кўзларин ихлос бирлан тикиб самога  
 Оҳ чекар, нола қилар...  
 У тинмай сажда этар ва ерни ўпар,  
 Бор кучи-ла кўкракка ураг бечора...  
 Мен чиқаркан, шошилиб юрар илгари,  
 Халқни ёриб, мен учун ўйл очар эди.  
 Сабрим битди, ниҳоят, мен жазм қилдим:  
 Худди ўзи сингари хизматчиши-ла,  
 Таниш бўлдим-да аста сўзлаша билдим,  
 Сирига воқиф бўлдим ҳайронлик била!  
 Гадой каби яшарди хор-зор ва юпун...  
 Бечорага кўрсата бошладим ёрдам.  
 Даастлаб асло кўнмади! Кейин у кам-кам  
 Ола бошлади: — «Шу ҳам кўпdir мен учун»...  
 Мен қайтиб олмасам, у кўзим олдида  
 Гадойларга улашди қолдирмай сира.  
 Ниҳоят тангрига шукурлар бўлсин!  
 Меним хонадонимда у топди макон —  
 Турмушимни ўзгартди у секин-секин;  
 Кўриб турибсен, сенга барчаси аён;  
 Ҳаттоки хотиним ҳам димоғ қилмади:  
 Тартюф унга оқсоҷдай парвона бўлар,  
 Бирорга сал қайрилиб, боққанин сезса,  
 Ўйлаб ўтирамай, уни шу онда ҳайдар!  
 Ҳатто менга раشكчи деб қўярканлар ном.  
 Унга не дер экайлар! — У бошқа тамом!  
 У ўз-ўзига пишиқ — энг кичик гуноҳ,  
 Анчайин бир қусурнинг қаттиқ душмани:  
 Тунлари уни чулғар фикр дарёси;  
 Шу вақтда бир бургани ўлдирса ногоҳ —  
 Ионасенми, гамдан кўз юммас бир он!

### Қ л е а н т

Бас, етар! Довдирама! Алданасен ёлғиз,  
 Бошқаларни қўй... Қандай телбалик ахир!  
 Гўдак эмасмиз, сендан нодон эмасмиз,  
 Наҳот кўрмасак...

### Оргон

О, эркин фикр!  
Сен сўзимга қулоқ сол — оғир-вазмин бўл:  
Ҳали унча кеч әмас, йўқса, иш мушкул!

### Клеант

Менга маълумдир ушбу мулоҳазалар.  
Сизнингча, ким зўр эса — у яшайди соф,  
Китдай сезгироқ бўлса бир киши агар,  
У шаксиз, ҳур фикрли, қаллоб, беинсоф —  
У боёқиши кечирилмас, шафқат этилмас.  
Бу ҳукм қўрқинч әмас! Дилимда меним  
Йўқдир чиркин туйғулар, бадкирдорликлар,  
Жилваланмадим ҳар нав ва келажагим  
Учун ниқоб остида... ташвишланмадим...  
Биз жуда ажойиб яратилганмиз:  
Биз бўлмағур матонат кўрсатиб, диндор  
Одамлардан аслида алдамчи, чексиз  
Мунофиқларни ҳеч фарқ қиласмиз; икror  
Қилайликки, ўлгудай бизлар риёкор.  
Тақдир насибасига әмасмиз рози,  
Биз ёлғиз бир нарсага жон кўйдирдимиз;  
Табиий сийомомизни йўқотиб беиз,  
Нима бўлсанк бўлайик — руҳнинг ўз зоти  
Бўлмаса бас... Мен буни анчайин айтдим.

### Оргон

Ҳа, шундай! Ақлга фақат сен етук,  
Ҳам таҳсил кўргансан, ҳам илминг буюк:  
Сенга довруқ! Қўлингга китоб ярашар!  
А биз бўлсанк әшаклар ва аҳмоқлармиз...  
Ҳаёт тажрибаси ҳам доно китоблар  
Бизга бўлмади насиб...

### Клеант

Қандай пуч гаплар!  
Инонгил — мен ўзимнинг қадрим биламен:  
Керакмас на камтарлик, на-да мақтаниш,  
Аммо, қандай ниқобда жилваланмасин,  
Муғомбири, маккор мендан қоча олмамиш,  
Ёлғонни ҳар вақт чиндан мен фарқ этамен...  
Чуқур ҳурмат қиласмен чин тақводорни,  
Лекин мұнофиқлардан қиласман нафрат!  
Барча икки юзлилар ва айёрларни,  
Авлиё кўринувчи, таассубпарат,  
Қароматфуруш бўлган юзсиз, ҳаёсиз  
Махлукларни кўришга тоқат йўқ ҳаргиз.  
Уларда йўқ ҳеч қандай эзгулик... Аммо  
Тамаъ бор, манфаат бор. Уларга дучор  
Бўлибсен, сени қурбон қилмоқлик асло  
Қийин әмас, — уларга йўл-йўриқ тайёр!  
Ҳалокатинг ўзгалар учунмиш нажот!  
Мақсадлари ифлосдир, қуроллар ёмон:  
Соддадил ҳалқ қўзида улар қадрдон,  
Улар дин чароғлари, раҳбари ҳаёт —

Барча ҳаракатлари юксак, мукаммал...  
 Шу юздан улар кучли, хавфли ҳар маҳал!  
 Шундайлардантир сенинг бу шоввозинг ҳам...  
 Бу ерда энди у саёқ муттаҳам —  
 Барча фазилатларнинг нодир тимсоли  
 Бўлсин-да, ҳурмат кўрсинг? У паст, алдамчи —  
 Сенинг пиринг, биринчи азиз одаминг?  
 Сенинг дўстинг, қардошинг? Оргон! Оргон! Боқ,  
 Дуруст ўйла! Сен жуда кўр, гумроҳ бу чоқ...

Оргон

Тугатдингми?

Клеант

Ҳа.

Оргон

Хай, сенга баҳт тилайман.

Клеант

Бирдам сабр эт. Бу баҳсни йигишириайик,  
 Оиласа тегишли суҳбат қилайлик.  
 Валерга сўз бергандинг, унутмагансен?

Оргон

Йўқ, унутган эмасмен.

Клеант

Қўрсатгандинг кунни ҳам...

Оргон

Ҳеч нимани унутмаймен.

Клеант

Орқага ташламоқнинг маъноси борми?

Оргон

Билмаймен.

Клеант

Балки сенда бошқача хаёллар бордир?

Оргон

Ҳар нима бўлса мумкин.

Клеант

Ваъдани бузиш?

Оргон

Мен бу ҳақда ҳеч нима деганим йўқ-ку.

Клеант

Сен демадинг... Лекин бу тараддуд...

Яна бирон сабабсиз...

Оргон

Қимга сабабсиз.

Клеант

Валер сўради сен-ла сўзлашувимни...

Оргон

Жуда соз

Клеант

Унга не деяй?

Оргон

Истаганинг айт.

Клеант

Эй-эй, Оргон! Сен нечун менга ҳам шундай  
Дудмал бир муомала қиласен ахир?  
Сезамен, бир нимага жазм қилгансен.  
Нимага уни менга билдирмагайсен...

Оргон

Қарорим сир эмасдир: вазифам нима  
Буюрса, шуни қилиш.

Клеант

Демакки, ваъдага вафо қиласен?

Оргон

Хайр.

Клеант

(ёлғиз)

Эҳ-э, қардошим Валер, бир кўриниш бер,  
Ишларинг бир оз чатоқ... Белни боғлайвер!

## Иккинчи акт

### I САҲНА

Оргон ҳам Мариана.

Оргон

Сен бу ерда бир ўзинг?

Мариана

Бир ўзим.

Оргон

Жуда соз, ҳеч кимса йўқдир.  
Сен билан сўзлашмакни орзу қиласен...  
(Эшик орқасига қарайди.)

Мариана

Бирон нарса қидирасизми?

Оргон

Зимдан тингловчилар кўп бунда, биламен...

Мариана

Биз ёлғизмиз-ку...

Оргон

Ҳар ёқни қараб чиқай!

Тинч кўринар... Қулоқ сол. Иш бундай дўстим,  
Яширмаймен, ҳали қиз бўлганинг учун  
Шу дамгача мен сендан бўлгандим мамнун...

**Мариана**

О, отажон! Инонингки мен...

**Оргон**

Кичик, маъсум бола каби сен  
Сўзларимдан чиқмагандирсан эҳтимол?  
Энди ўсдинг... Ким билар ишониш маҳол...

**Мариана**

Ҳамиша ва ҳар ишда сизга садоқат,—  
Онт ичаман, менда йўқ бундан зўр орзу!

**Оргон**

Мана бу менга ёқар! Бу жавоб ғоят  
Таъзимкор ва маъқул... аъло жавоб бу!  
А, сен нима ўйлайсан, бизнинг энг азиз  
Жонон Тартюф ҳақида?

**Мариана**

Мен?

**Оргон**

Ха, албатта сен!  
У тўғрида не дерсан, биз эшитамиз?

**Мариана**

Сизга нимайки ёқса, шу фикрдамиз...

## II САҲНА

**Оргон, Мариана ва Дорина**  
Дорина секингина кириб орқада туради ва Оргон уни сезмайди.

**Оргон**

Сен жуда ақлли қиз! Айт менга, демак,  
Сен уни шу даражада ҳурмат қиласан,  
Шу қадар севасанки, сен шаръян тегмоқ,  
Унга никоҳланишни баҳт деб биласан!

**Мариана**

(ҳайратда)

Нима?

**Оргон**

А?

**Мариана**

Мен...

**Оргон**

Хўш?

**Мариана**

Менга кўриндики...

О р г о н

Қандай?

М а р и а н а

Сўзингиз тушунмадим: кимни севамен.  
Кимни ҳурмат қиласмен ва кимга шаръан  
Тегиши ўзим учун баҳт деб биласен?

О р г о н

Тартюфга тегиши.

М а р и а н а

Йўқ! Чин айтамен,  
Отажон, мен бу ишга бўлмасмен рози!  
Ёлғон сўзлашнинг сира борми фойдаси?

О р г о н

Мен бу ишни бўлсин дейман...

М а р и а н а

Хоҳлайсиз-ки мен Тартюфга кўнгил қўяй?

О р г о н

Ҳа! Сен унинг хотини бўлишинг керак —  
Мен бунга бел боғладим — қизим кўнажак!  
Лутф эт-да, кўз ёш тўкма!

(Доринани кўриб қолиб)

Нега бундасан?

Томошавозликка боқ! Яширин кириб —  
Эшиитмоқда! Ниҳоят мен бирор билан  
Махфий сўзлашмоқдан ҳам маҳрум бўлибман.

Д о р и н а

Сизга айтишим керак, бу ҳақда «миш-миш»  
Ҳар хил гап-сўз кўпдандир уйда боради —  
Яна жуда махфийдир шунинг сингари...  
Албатта ҳазил дейман: бўлмағур бир иш!

О р г о н

Дейсиз-ки бўлмағур иш. Қандай жасорат...  
Бу тегсиз гап-мас, жоним, эзгу ҳақиқат!

Д о р и н а

Мумкин эмас.

О р г о н

Мен айтяпман!

Д о р и н а

Ҳазиллашасиз.

О р г о н

Мана кўрармен...

Д о р и н а

Ишонмаймен ҳеч қачон...

О р г о н

Ишонасан!

Д о р и н а

Йўқ.

О р г о н

Оҳ, жаҳлимни чиқарма!

Д о р и н а

(Марианага)

Қўрқмасангиз бўлади ҳеч нимадан сиз?

О р г о н

Дорина!

Д о р и н а

Лаббай. Ҳаммаси пуч гап, бўш бир ҳангома.

О р г о н

Жим бўл!

Д о р и н а

Хўп, яхши — ишонайик... Оқибат ёмон!

Афтига қарасанг, у ақлли одам,

Ёши унча-мунчага бориб қолган ҳам,

Лекин яхши кўриниш учун жиннилик

Қилади, яна кимга у беради жон?

О р г о н

Тингла! Мен кўпдан бўён бардош қиласмен,

Сабр-бардошнинг чеки бордир, биламен...

Д о р и н а

Хўп, яна сиз бир нафас кўрсатинг бардош.

Аччиғланмай, мен билан сўзлашинг юввош!

Ўйлаб кўринг-ки, сизда фақат битта қиз —

Нима учун маҳв этмак истайсиз уни?

Тасқара, йўқсул бўлса, ё бошпанасиз...

Аммо шундай чиройли бир қизни ана

Шунча кўп мол-жон билан бир гадой сари

Узатиш! Иўлиқибсиз зўр хазинага!

Сизга унинг нимаси мунча ёқади?

О р г о н

Балли сенинг ақлингга! У қашшоқлиги

Билан улуг! У ҳар бир алами билан

Самоватга интилар, кўнгил оқлиги

Сабабли маҳрум дунё неъматларидан...

Лекин бу қийинликдан, албатта, уни

Кутқарамен: қайтариб олади у чоғ

Гўзал, катта ерлари билан боғу роғ,

Тикланади зодагон асл уруғи!

Д о р и н а

Катта ерлар? Асл уруг? Қандай мўъжиза!

Сизга шуларнинг барин айтдими ўзи?

Үйлайсан-ки тикилган самога кўзи,  
 Бутун фикри-зикри ер неъматида-ку!  
 Бу гап сизга, кўрамен ёқмайди сира?  
 Сукут этамен. Унинг авлод-аждоди  
 Қолсин-да, сўзлашайлик ўзи ҳамиша...  
 Сиз у шахсада топасиз кўнгил сафоси,  
 Лекин бундай никоҳлар эса ҳамиша  
 Қандай натижа берар — ўйламагансиз:  
 Қонда қайнаса ёшлик бир булоқ каби  
 Эрга бўлмаса ишқдан бир учқун, бир из,  
 Аёлни жиловламас никоҳ боғичи!  
 Қарабсанки, бошқага қўйибди кўнгил,  
 Гуноҳини у шўрлик яшира олмаса —  
 Унга ачинмас кимса...

Бунга айбдорми ул?

### О р г о н

Мана оқила! Қандай яшамоқ керак --  
 Сендан олғумиз сабоқ!

### Д о р и н а

Нима бўпти? Ўқутамен  
 Тажрибаларим, балки иш кўрар андак...

### О р г о н

Хўп, яхши! Ҳазилларга энди тоқат тоқ...  
 (Марианага)

Мен отангмен ва сендан ёмон нарсани  
 Талаб қилмоғим мумкин эмас албатта;  
 На десам, севганимдан дейман ҳамиша.  
 Хўп, Валерга бермоқча сени  
 Ваъда қилган бўлайин...  
 Лекин қартабоз эмиш, биласанми у...

### Д о р и н а

Мана бу — бўхтон!

### О р г о н

Ҳукм этмангиз бот!  
 Қартабоз, ҳам умуман фикри бизга ёт...

### Д о р и н а

Шу ҳам айб бўлибди-ку!

### О р г о н

Сенга алоқаси йўқ! Қизим, бор гап шу,  
 Чиқармоқ керакдир Валерни ёддан...  
 Аммо қайғурма, зое кўрмадинг зотан:  
 Тартюф... Ҳа, у гўзал эр бус-бутун!  
 Сизда севги эртаги битмас-туганмас.  
 Биз-чи — томоша қилиб хурсанд бўлсак бас!  
 Яна истаган ёққа ўришинг мумкин...

### Д о р и н а

Юриш, айлантиришни биларми бу қиз?  
 Уни аҳмоқ қиласиди бўлиб вафосиз,  
 Мен бунга ионаман!

**Оргон**

Нималар вайсар! Ераб, нималар вайсар!

**Дорина**

Вайсаганим йўқ, бўлур ишни айтамен...

**Оргон**

Гапирма! Товушинг ўчир!

**Дорина**

Мана бу дилбар!

Ахир нетай, мен сизни севарсан агар...

**Оргон**

Севиб овора бўлма!

**Дорина**

А мен севамен!

Нима қилиш керак?

**Оргон**

А!

**Дорина**

Ҳар қандай одам  
Масхараларкан сизни, хафа бўламен.

**Оргон**

Тинкам қуриди!

**Дорина**

Ота бўлмай қуриб кет! — дейди ҳамма ҳам.  
Ачинмайди ҳаёсиз, дерлар дам-бадам.

**Оргон**

Жим бўласенми, илон?

**Дорина**

Аҳ, сиз қандай ғазабланасиз!  
Гуноҳ эмасмикан бу?

**Оргон**

Гуноҳга беихтиёр мажбур этган ўзинг-ку...  
Сен қулоқ сол, мана шу энг сўнгги фармон:  
Жим бўл!

**Дорина**

Жим турамен... бари бир ўйлаймен шунис...

**Оргон**

О, ўйлайвер — ўз ичингда...  
Лекин ғинг деб гапирма!

(Marijanaga)

Нималар кераклигини ўйлаб қўйибман...

**Дорина**  
(четга қараб)

Ераб,  
Тилим қандай қичияпти!

## Оргон

Тартюф олифта эмас, танти ҳам эмас...  
Аксинча, у... ҳа, қандай айтишим мумкин?

Дорина  
(четга қараб)

У тасқарадир!

## Оргон

На хасис, на зуҳумли... Тушунасанми?  
Сен унга теккач, билиб оласан бутун...

Дорина  
(четга қараб)

Ҳа, антиқа!

(Оргон Доринага қараб бурлади, қўлларини  
қовуштиради ва унинг юзига тикилиб эшигади.)

Агар менга бирор  
Зўрлаб уйланишни қилсайди орзу,  
Мен ўз ишимни билиб қиласдим дарров!  
Қилмишга яраша

Жазоланар эди у!

Оргон  
(Доринага)

Демакки, мен бу ерда бир сариқ чақа?

## Дорина

Сизни бирор сабаб-да нотинч қилмадим:  
Буюрганингиз каби сукут қиламен...

## Оргон

Ёлғон айтасен!

Гапирмоқдасен!

## Дорина

Киши ўз-ўзила жим  
Ўйлаши мумкин эмас? Бу гап қанақа?

Оргон  
(четга қараб)

Йўқ, азизим, сенга бир таълим лозимдир!  
Мендан ҳозир оласен энг аъло сабоқ...

Доринани урмоқ учун ўнғай бир вазият олади ва қизи билан гаплашаркан,  
ҳар бир сўзни айтганда Дорина томон бурлади. Лекин Дорина ҳаракатсиз,  
жим туради.

Қизим, барча шубҳангни улоқтири узоқ!  
Бахтингга яхши гаров — танлаганимдир...  
(Доринага қараб)  
Нимага жим турасен?

## Дорина

Айтадиган гапим йўқ.

## Оргон

Жилла бўлмаса бир сўз!

Д о р и н а

Мен истамаймен.

О р г о н

Шошма, сени тутамен!

Д о р и н а

Унча аҳмоқ эмасмен тутқич бергали.

О р г о н

(*Марианага*)

Умид қиласмен, тезда зеҳн қўясен.  
Сен бола эмас. Ўзинг муҳокамадан  
Бирма-бир ўтказасен...

Д о р и н а

(*қоча туриб*)

Хеч бўлмас бу уят иш!

О р г о н

(*Марианага*)

Дўстим, кўриб турибен... бунда вафо бор!  
Айримасайдим сўнгги куч-қувватимдан...  
Мен ўзимда эмасмен... титроқ ичимда...  
Ёлғиз қол-да, яхшилаб ўйлаб, ўлчаб кўр.  
Бир оз кезай... кўнглим жиндай ором топсин...  
(*Чиқиб кетади.*)

### III САҲНА

М а р и а н а, Д о р и н а.

Д о р и н а

Сиз учун кўп талашдим, сиз соқовмисиз?  
Чиндан нодир бир қилиқ, эшитилмаган:  
Лом-мим демасдан  
Шундай таклифни тинглаш — сокин, шиддатсиз!

М а р и а н а

Мен нима қилай ахир, отам хоҳласа...

Д о р и н а

Нетай! Үхшатиб жавоб бермоқлик лозим!..

М а р и а н а

Яъни қай турда?

Д о р и н а

Айтиш керакди — севги муҳокамага,  
Ақлга бўйсунмас: юрагимга ўзга шахс ҳоким,  
Сиз учун эрга тегиш жуда жиддий иш...  
Отангиз Тартюфга кўнгил қўйган бўлса чин,  
У вақтда ўзи унга тез тега қолсин.

М а р и а н а

Вой ўлай, ҳушинг борми? Шундай жавоб отага?

**Д о р и н а**

Сиз самимий равишда менга айтингиз:  
Валерни севасизми, ёки севмайсиз?

**М а р и а н а**

Дорина! Инсоний ҳисдан бегона!  
Мени қийнамоқ сенга жиноят бўлур...  
Сенга очмаганмидим бутун юрагим.  
Валернинг ишқи билан борлиғим куюр, —  
Сен буни билмагандек, сўрайсен дардим.

**Д о р и н а**

Мен бу ҳақда эшиздим юзларча дафъа,  
Бунга боқмасдан, менда шак ва гумон бор:  
Сизнингча бу муҳаббат, аммо менимча,  
Ишқингиз гўёки бир хаёлга ўхшар.

**М а р и а н а**

Демакки мен ўзимни ва ҳаммани ҳам  
Алдарканман! Хўп, яхши...

**Д о р и н а**

Демак, севасиз шаксиз?

**М а р и а н а**

Мен топинамен!

**Д о р и н а**

У ҳам сизни севарми?

**М а р и а н а**

Ҳа, ўйлашимча шундай...

**Д о р и н а**

Менимча иковингиз тез қовушмоққа  
Интилсангизлар керак — бир кун ҳам кутмай!

**М а р и а н а**

Оҳ, кошкийди! Бу чиндан бўларми лекин?  
Тартюофга қарашга ҳам тобим йўқ бир зум!

**Д о р и н а**

Ҳаммаси эса бизнинг жавобга боғлиқ...

**М а р и а н а**

Менга қолмиш фақат бир йўл — бу ўлим!

**Д о р и н а**

Улиммиш! Иқрор этди, буни билмабман...  
Жуда соз, энг содда чорадир:  
Маъшуқа ўзини бир зумда ўлдирадир,  
Бу билан иш тамомдир... Шундай хом фикр  
Билан қизиқиша оласиз жиддан?

**М а р и а н а**

Дорина! Нима бўлдӣ қайғу-ҳасратим  
Кўнглингга қитдай бўлсин қилмасин таъсир?

## Д о р и н а

Тўғриси мен сизга ҳеч ачинмадим...  
 Бутунлай ачинмайман: ранжитади шу,  
 Ёш боладек ўз-ўзин ўтга отиш бу.

## М а р и а н а

Биласан мен ювош бир қиз ҳамиша.

## Д о р и н а

Ювошликка йўқ эҳтиёж шу пайтда.

## М а р и а н а

Валернинг ўзи отам билан сўзлашсин,  
 Мен ахир унинг нишонлисиман.

## Д о р и н а

Кўп соз! Ўзни гуноҳдан қутқариб яна  
 Бутун юкни ағдардинг куёв болага?

## М а р и а н а

Демак, сен истайсан-ки аёл ҳаёсин  
 Ва қизлик вазифасин бутун унутай?..

## Д о р и н а

Вой, йўқ!  
 Мен сизга ҳеч бундай демадим!  
 Ишга аралашишга йўқ меним ҳаддим...  
 Мен ҳайрон қолган нарса оддий ва равшан —  
 Тартюф бекаси бўлмиш ўзингиз учун  
 Бир мартаба ва дилкаш кўринар, дейман...  
 Аслида куёв йигит Тартюф бўлмасин?  
 Айёр — ҳар бир балодан ўтар чап бериб,  
 Қачон қарасанг — соғлом: иштаҳа — карнай,  
 Эмиш аждоди донгдор, юзи қизил олмадай?  
 Нима учун у сизга ёқа қолмасин!

## М а р и а н а

Ё раббим!

## Д о р и н а

Унинг хотини бўлиш?  
 Шундай севинчдан ўзни унутиш мумкин!

## М а р и а н а

Сен бу тўғрида менга гапирма бир дам!  
 Мен Тартюфга тегмайман.  
 Сўз билан, кенгаш билан менга бер ёрдам!  
 Дорина! Сўзламайсен? Гапир, кутамен...

## Д о р и н а

Беҳудадир! Яхшиси ёрдам кутмангиз!  
 Мен маслаҳат бергали ботинолмаймен...  
 Бундан фойда чиқарми? Англай олмаймен —  
 Нима лозим? Қай тўғрида сиз дард чекасиз?  
 Уйланг ахир: севган эр ўз бекасини —  
 Чиройли хотинни назокат билан

Аравага ўтқизиб, олиб кетади  
 Ўз шаҳрига... у ерда шарафли номни  
 Қутлаб амма-холалар очади қучоқ.  
 Ва фийбатлар тўрига ўралиб у чоқ  
 Давр суриб юражаксиз, гўзал қўғирчоқ!

*Мариана*  
 У мени кўп ҳордирап!  
 Нима қилишим керак?

*Дорина*  
 Сизга айта олмаймен:  
 Сиз — хоним, мен эса...

*Мариана*  
 Ёлворамен, Дорина!

*Дорина*  
 Ҳамма билсин, ҳамма! Жазоланинг сиз...

*Мариана*  
 Тингла...

*Дорина*  
 Йўқ!

*Мариана*  
 Аммо, меним ҳаётим, иффатим...

*Дорина*  
 Балли, Тартюфга тегишига ичингиз қасам,  
 Олам гулистон бўлур, иш тамом...

*Мариана*  
 Ёрдам кутамен  
 Сендан, Дорина.

*Дорина*  
 Хўжа ихтиёри-ла,  
 Тартюфга эш бўлишга мажбурсиз мудом...

*Мариана*  
 Ҳа, шундайми, мен энди оғиз очмаймен!  
 Энди ихтиёр сенда: кул ва аччиғлан —  
 Мен сенсиз ҳам ишимни қила олғаймен...  
 Лекин бил-ки, ҳар ишга тайёрмен бу он!  
 (кетишига чоғланар)

*Дорина*  
 Шошманг! Ҳар ҳолда сизга ачинмоқ даркор...  
 Жаҳлим чиқди, бунга ҳам ўзингиз айбдор.  
 Ўтган ишга салавот...

*Мариана*  
 Оҳ, яхшидир ўлмоқ!

*Дорина*  
 Шу ҳам гап бўлти-ю...  
 Сўзлашиб олайик... Масалан... Мана  
 Жаноб Валернинг ўзи келмоқда!

#### IV САҲНА

Мариана, Дорина ва Валер.

Валер

Менга билдиришди ёқимли хабар  
Анови... Тартюф... билан сиз тўғрингизда!

Мариана

Меним тўғримда ҳам?

Валер

Бу нима, ҳазилми, ё...

У сизнинг күёвми, а?

Мариана

Отам ўз хоҳишин сўзлади шу дам...

Валер

Наҳотки отангиз-а?

Мариана

Отамнинг хоҳиши...

Валер

А, сиз-чи?

Мариана

Билмаймен.

Валер

А, қандай яхши жавоб...

Билмайсизми?

Мариана

Иўқ...

Валер

Иўқ?

Мариана

Эҳтимол берурсиз менга маслаҳат

Валер

Дарҳол рози бўлишга  
Маслаҳат берурмей сизга!

Мариана

Сизнинг маслаҳат шуми?

Валер

Ха.

Мариана

Ҳазил эмас-а?

Валер

Маслаҳатда ҳеч вақт бўлмас ҳазилим.

Мариана

Ташаккур... Энди бизга видолашувми?

В а л е р

Кўряпман-ки, қийналмай бўласиз рози?

М а р и а н а

Бундайин кенгашга қулоқ осамен...

В а л е р

Шу кенгаш-ла истайман сизга ёқмоқни.

М а р и а н а

Бу маслаҳат марҳамат билан баробар...

Д о р и н а

(иҷкарироқ бораркан)

Шу ҳам гапми! Не билан битар бу ғовға?

В а л е р

Мана ишқ деган нима! Тарқалди туман,  
Туманлар орқасида налар кўрамен.  
Алдов... Фақат бир алдов! Мен алданганмен!

М а р и а н а

Үтинаман... Бу ҳақда сўзламангиз, бас!  
Меним саволим жуда равшанди... Бунга  
Сиз жавоб қайтардингиз эркин кўнгил-ла...  
Ана шу йўлни танлаймен, холос!

В а л е р

Сўзларимда нима маъно — аччиқми сўзим?  
Жилла қурса шу билан оламен ўним...

М а р и а н а

Қилмайсиз хато...

В а л е р

Ҳар вақтдаги сингари!  
Очиқ иқрор этингиз, мени ҳеч қачон  
Севмаганимидингиз-а?

М а р и а н а

Нима ўйласангиз, ихтиёр сизда...

В а л е р

Бунга йўқ гумон!  
Демак — таҳқир этилдим... Кўнгил орзузи  
Самимий бир саломни қайдан ахтарай —  
Балки унда хўрламаслар йигит туйғуни...  
Балки мен инонган бордир бир кўнгил,  
Балки йўқотганимни тўлдирап буткул!

М а р и а н а

Йўқотганингиз шундай кичик, у учун  
Юпаниш мумкин...

В а л е р

Бўлмаса-чи! Тиришиб кўрамен, аммо

Унутмоқлик имконсиз бўлса бусбутун,  
 Қўл силтайман, эътироф қилмайман асло.  
 Майли, қийналай сассиз... Дилимда тутун...  
 Ёлқинин сизгагина сақлайнин мангу —  
 Ва сиз ўксиз қолдирган юракни эса  
 Асло жалб этмасин ўзга бир дилдор?

Мариана

Йўқ, йўқ! Аксинча орзу этдигим ушбу:  
 Тездан сиз эришингиз барча муродга...

Валер

Ха, шундай денг! Хоҳлайсиз?

Мариана

Ха...

Валер

Равшан масала; оласиз лаззат,  
 Қилмаймен шикоят,  
 Чарчадим: чексиз ҳақорат.  
 Майли, на чора, кетишига розиман,  
 Бу хусусда мен асло айбли эмасман!  
*(Эшикка бурлади.)*

Мариана

Йўқ, унумайман.

Валер  
*(қайтиб)*

Билиб қўйингўй,  
 Содир бўлмасайди сиздан ушбу ҳол...

Мариана

Ха, ҳа...

Валер  
*(кета туриб)*

Ҳамма ипни раҳмсиз узган ўзингиз!

Мариана

Майли шундай бўлсин.

Валер

Вафосизликка ҳам мисол ўзингиз!

Мариана

Менми бевафо? Майли сизнингча бўлсин!

Валер  
*(Эшикка бориб, сўнг қайтади.)*

А?

Мариана

Нима?

Валер

Чақирдингиз шекилли?

Мариана

Хожат сезмадим!

Валер

Бардам бўлишингиз тилайман,

Хайр...

(Секин-секин эшикка кетади.)

Мариана

Хайр, алвидо...

Дорина

(Олдинга юради)

Ё раббим, бу нечук хархаша?

Сизда йўқми андиша,

(Валерга)

Уят-е, сиз йигитсиз-ку,

Лекин қизлардан баттар.

(Кўлини ушлайди.)

Валер

(Гўё қаршилик қилган бўлади)

Сенга нима?

Дорина

Бу ёққа келинг!

Валер

Нима учун?

Дорина

Марҳамат қилинг!

Валер

Мен истамаймен бутун...

Дорина

Ха сиз.

Мариана

(четга қараб)

Маълум бўлди-ки, мендан қочаётир у, —  
Яхшиси мен кетайин...

Дорина

(Валерни қўйиб юборади ва Марианага югурлади)

Энди бунинг қилиғини қаранг!

Сиз қайга?

Мариана

Қўй, тегма менга!

Дорина

Бу нимаси-я!

Мариана

Йўқ, йўқ! Уринишларинг беҳуда, қўйвор!



В а л е р  
(четга қараб)

Бетимга қарагиси келмас... Тез кетай!

Д о р и н а  
(Марианани қўйиб, Валерни ушлайди)

Тағинми? Қайси бирингиз ушлай?  
Лекин мен ўз сўзим ўтказажакмен...  
(Мариана ҳам Валернинг қўлларидан ушлаб, олдинга  
суради.)

Юрингчи бу томонга!

В а л е р  
(Д о р и н а г а)

Хўш?

М а р и а н а  
Бундан кейин?

Д о р и н а

Аввало истардим, сизларни яраштирай,  
Кейин сиз билан бирга, бир йўл ахтарай.  
(Валерга қараб)

Ҳаё қани, оздингизми ақлдан?  
Қилиқларингизга ҳайронман.

В а л е р

Ахир, у ўзи-ку.

Д о р и н а  
(Марианага)

Сиз-чи, хоним? Сувда бўккандай,  
Бу нимаси, ҳай-ҳай!

М а р и а н а

Сен кўрдингми, у ҳали  
Мендан енгил айрилишга жасоратланди!

Д о р и н а  
(Валерга)

Ҳаммаси аҳмоқлик! Бу қизда сизга  
Хотин бўлишдан ўзга йўқдир бир армон.  
Истасангиз онт ичай.

(Марианага)

Унинг юраги сизда,  
Гапимнинг чинлигига бошимни тикай!

М а р и а н а  
(Валерга)

Сиз менга бердингиз шундай маслаҳат...

В а л е р  
(Марианага)

Менга ўзингиз шундай савол бердингиз.

Д о р и н а

Етар, эркалар, тутатинг асқияни.

Бириңиз бириңиздан баттар; беринг құлларни.  
(*Валерга*)

Қани, жаноб, қани!  
(*Валер құлни Доринага үзататуриб*)  
На учун?

Д о р и н а  
(*Марианага*)

Сиз ҳам берингиз!  
(*құлни Доринага үзатаркан*)  
Нечун?

Д о р и н а

Ортиқ ярашингиз! Ҳа, мана шундай...  
Бир-бириңизни севиб, түйни ҳам дарқол  
Тайёр этгайсиз — аммо нақ айрилгундай  
Бўлдингиз! Ҳеч нимага ўхшамас бу ҳол...

*Мариана ҳам Валер бирмунча вақт қўл ушлашиб турадилар, аммо бир-бирларига қарамайдилар.*

В а л е р  
(*Марианага боқиб*)

Ҳануз жаҳлдамисиз?  
*Мариана табассум билан Валерга қарайди.*

Д о р и н а  
(*четга*)

Ишқдан одамлар овсар бўлар лаҳзада!

В а л е р  
(*Марианага*)

Аммо, золимсиз! Ҳафа қилиш ҳеч гапмас,  
Бутун дилни парчалар — қизиқ ҳангома.

М а р и а н а

Сиз ҳам ўжарсиз, ношукурсиз жуда.

Д о р и н а

Жаноблар, жанжаллаша берарсиз кейин:  
Ҳали бўйнимиздадир Тартюфнинг қўли...

М а р и а н а

Уни нима қиласиз?

Д о р и н а

Ҳозирча чидам...

(*Марианага*)

Раҳм этар эгам.

(*Валерга*)

Унча катта ташвишмас!

(*Марианага*)

Сиз учун энг муҳими — айёрлик йўли...  
Уни сағал-пағал қилиб умидвор, —  
Орқага силтайверинг; ҳар хил баҳона:  
Айтинг-ки дилим ғаш, кўрдим ёмон туш,  
Гоҳ денг, юракда аллақандай титроқ бор,

Ҳар хил машъум хаёллар калаваси —  
Гўё бўйнингизда дор.  
Кейин маълум бўлур! А ҳозир эса  
Тарқалингиз, токи кўрмасин кимса...  
(Валерга)

Сиз ҳам ўзингиз учун қилинг ҳаракат:  
Дўст-ёр билан кенгашинг ва сўзлашинг сиз...  
Қани энди марш!

**Валер**

(Марианага)

Кетаман, кўнглим тинч: мени севасиз —  
Бу нарса менинг учун ҳаммадан қиммат!

**Мариана**

(Валерга)

Майли, отам ўз сўзин бузмасин ҳаргиз,  
Майли, сизни оғизга олмасин, ахир  
Мен сизники, ҳеч кимса қилмас менга ҳад!

**Валер**

Оҳ, агарда ботинсам...

**Дорина**

Этмасмен рухсат!  
(Иккаловини елкасидан ушлаб, турли томонга юборади.)  
Сиз у ёққа, сиз, бекач, бу ёққа!.. Ҳайр!

## Учинчи акт

### I САҲНА

Дамис Дорина.

**Дамис**

Майли, бошимда чақсин даҳшатли чақмоқ,  
Майли, мен бориб турган разил бўлайин,  
Майли... мен ҳар балога йўлиқай, бироқ,  
Мен унга кўрсатаман!

**Дорина**

Биламиз, лекин,  
Сиз анча ҳовлиқмасиз ва дали-ғули...  
Аҳмоқликка арзийдими? Ишонинг жиддан  
Тайёрлик кўришлар ва гап-сўзлар билан  
Орқага ташлади кўп замон буни!

**Дамис**

Мен ёлғизгина унга — у дарбадарга  
Икки оғиз сўзимни шипшитмоқчийдим...

**Дорина**

Вой, қўйинг! Аралашмай, кетаверинг жим.  
Ҳовлиқмасдан тушуниб ишлаш соз нарса...  
Ўгай онангиз ҳозир  
Тартюф билан шу жойда қилади суҳбат...  
Тартюф унинг қошида кўп дафъа зоҳир

Қилди ўз туйғусини... Гумоним сұхбат...  
 Ажзини — иқрор этиш бежизмас албат...  
 Биз учун яхши дастак бўлур бу ахир.  
 Хўп, мен бунда кутамен, — жўнанг бундан сиз...

Д а м и с

Нима учун? Қоламен мен ҳам...

Д о р и н а

Ҳеч, ҳеч, ҳеч!

Қўйинг тўйиб гаплашсин икови тип тинч...

Д а м и с

Тилим қисамен...

Д о р и н а

Гарчи қасам ичиигиз —  
 Жим туришингизга мен ишонаменми?

Кетинг!

Д а м и с

Йўқ!

Д о р и н а

Демак, бизга ёрдамлашиш-мас,  
 Ишга тўсиқ бўлишни истарсиз балки?  
 Мана ўзи келмоқда! Кетинг шу нафас!

Дамис ичкарига, эшик орқасига яширинади.

## II САҲНА

Д о р и н а в а Т а р т ю ф.

(Доринани кўриб қолиб, орқасига айланиб, эшикка  
 қараб гапиради.)

Ишим битди... Ҳа, яшир қамчи, хирқани;  
 Яхши қол! Бирор мени агар сўраса,  
 Айтки, қамоқхонанинг бечоралари  
 Учун бергали кетди бир оз садақа.

Д о р и н а  
 (ўзича)

Мақтандоқ!

Т а р т ю ф

Сўзлашмоқчи эдинг мен билан?

Д о р и н а

Ҳа...

Т а р т ю ф

Ё тангirim! Тўхта-чи...

(Киссасидан дастрўмолини олади.)

Ўтинамен — ол...

Д о р и н а

Нега?

Т а р т ю ф

Ура-чи!

Тамом ўра, баданга кўзим тушмасин!  
Қани ҳаё! Бу қандай чиркин ва бидъат...

### Д о р и н а

Сиз йўлдан оздиришга ожизсиз лекин!  
Тўғрисини айтсан, менга бари бир:  
Сиз қандай вазиятда бўлмангиз, сабр —  
Бардош билан қарай олардим фақат.

### Т а р т ю ф

Сўзлама! Эшигтмаймен сени... Кетамен!

### Д о р и н а

Йўқ, йўқ! Сиз қолаверинг — сукут этамен...  
Мени сизга юборди бекам, илтимос —  
Қилди икки оғиз сўз-чун ташриф этишни...

### Т а р т ю ф

Биласан-ку, ҳамиша тайёрмен холос...

### Д о р и н а (четга қараб)

Тамом бўшашибди! Наҳот пайқамиш ишни?

### Т а р т ю ф

У қай вақтда келади?

### Д о р и н а Ўйлаймен, — ҳозир...

Сизлар шунда қолинглар, у келаётир!

## III САҲНА

### Т а р т ю ф в а Э л ь м и р а .

### Т а р т ю ф

Қабул айлангиз маъсум ҳислар арзини:  
Ҳар ерда ҳозир-нозир ҳақ таоло ҳам,  
Бутун умр озайтмасин ўз карамини —  
Кунларингизга бўлсин нур қувонч ҳамдам...

### Э л ь м и р а

Сизга ташаккур яхши ниятлар учун!  
Утирайлик-чи, бизга бўлур ўнғайроқ...

### Т а р т ю ф

Тузалдингизми қаттиқ оғриқдан бутун.

### Э л ь м и р а

Ҳа-а!

### Т а р т ю ф

Меним муножаатим ҳақ  
Даргоҳига етибдими — менга номаълум,  
Аммо, туну кун сизни мен қилдим дуо,  
Риёзатларга ўзни қилдим мубтало...

Э л ь м и р а

Менга бу хуш келса ҳам... хижолат тортғум...

Т а р т ю ф

Сизнинг нозик умрингиз сақламоқ учун —  
Ҳаётимдан кечардим!

Э л ь м и р а

Билмадим, шундай

Азиз қурбон мен учун бўлгай ноўрин...

Т а р т ю ф

Сизга арзигудайин эмас бу қурбон!  
Кимнинг қўлидан келар қадрингиз билиш...

Э л ь м и р а

Кечириңгиз! Сиз билан бир оз сўзлашиш  
Учун келган эдим... Биз бу ерда ёлғиз...

Т а р т ю ф

Ҳа, ёлғизмиз! — Мени талаб қилмиш самолар!  
Муножаатимни улар эшигтан шаксиз,  
Рўй берди хаёл қилган орзулад якбор!

Э л ь м и р а

Сиз билан очиқ, яққол сўзлашмак даркор...

Дамис ўзи яширинган эшикни сал очиб, ўзини кўрсатмасдан муколимага  
қулоқ солади.

Т а р т ю ф

Бутун дилимни очмоқ бу кўпдан мурод!  
Ишонинг-ки, сиз ҳусн билан товланиб,  
Суронли ошиқлар-ла бутун қуршалиб,  
Юраркансиж, ишонинг, энди қасамёд,—  
Шунда ҳаяжонланиб, қўтартсан фарёд,  
Қўрмангиз сиз бу ишда ҳасад ё газаб,  
Қабргача садоқатим дилда лабо-лаб!  
Онт ичамен...

Э л ь м и р а

Албатта, ишончим комил,  
Менга яхшилик исташ сизда таомил...

Т а р т ю ф

(Эльмиранинг қўлини ушлаб, қисиб)  
Сиз хато қилмагансиз! Кўнглимнинг майли...

Э л ь м и р а

Вой, оғритдингиз!

Т а р т ю ф

Кечириңг... Бу кўнгил дайди...  
Сал оғриқни мен сизга раво кўрамен?  
(Кўлини Эльмиранинг тиззасига қўяди.)

Э л ь м и р а

Вой, сизга нима бўлди?

## Т а р т ю ф

Қизиқамен матаға...  
Қандай юмшоқ-а!

## Э л ь м и р а

Йүқ, йүқ! Қўйинг! Мен буни ёмон кўрамен,—  
Ва қитиқдан қўрқаман...

(Эльмира ўз курсисини нарироқ суради, Тартюф яна ёндошади.)

## Т а р т ю ф

(Эльмиранинг дуррачасига қўл тегизиб)

Бу тўқима рўмолга  
Ҳеч баҳо йўқдир! Қандай нозик ва енгил!  
Гули, безакларининг нафосатин кўр!  
Мана бу ишда узоқ кетибсиз дадил...

## Э л ь м и р а

Биз ҳам асли суҳбатдан узоқлашдик, ҳа  
Ишонса бўлармикан? — Ҳар ерда лекин  
Эшиштамен-ки, эрим ваъдага вафо  
Қилмасдан, қизни сизга атамиш гўё...



## Т а р т ю ф

У менга чертиб ўтди... Эвоҳ! Хаёл чин  
Саодатни, ўзга бир баҳт қўмсар ҳар чоқ!

## Э л ь м и р а

Тушунамен... Дунёвий баҳтдан сиз йироқ!

## Т а р т ю ф

Туғилмадим тош кўнгил билан мен асло!

## Э л ь м и р а

Кўзларингиз тикилган қўкка доимо...

## Т а р т ю ф

Ихлос билан тангрига қилиб ибодат,  
Ерда ҳам — унинг ажиб манзаралари  
Ичиди дам оламиз баъзан бағоят  
Чиройли нимарсалар — диллар эрмаги.  
Дунёмизда оз эмас соҳибжамоллар:  
Лекин порлоқ нурағшон ҳуснинг ҳамма  
Келишган андомлари битта санамда —  
Ёлғиз сизнинг суратга қўйилмиш, дилдор!  
Сиз намоён бўлдингиз — мен ўшал онда  
Нафис пари ҳуснига бўлибман мафтун,  
Борлигимни қоплади мубҳам ҳис бутун.—  
Ёр ишқининг сафоси ўйнади қонда!  
Дастлаб ўйладим-ки — бу гумроҳлик бўлғай,  
Ҳазиллашади менга шайтон ҳукмрон.  
Қаттиқ жазм айладимки — сизни тарқ этай,  
Кўзимдан, ҳам хаёлдан кўчинг бенишон...  
Мен тезда кўра олдим: ҳаммаси равшан —  
Менинг ташвиш тортганим беҳуда экан,  
Руҳимга таҳдид этмас васваса ҳеч бир,  
Онгладим бу эҳтирос гуноҳмас... берилдим ахир!  
Қўрқмаигиз жасурона эътироғимдан:  
Эзгу хаёлларимни дилга тугамен,  
Юрагингиз тўладир нозик ҳис билан,  
Гадойдек бошим эгиг эҳсон кутамен...  
Тинглайсиз, арзи ҳолдан қайга қочайин,  
Тақдир ёзғанмикан менга саодат,—  
Сизнинг ихтиёрга ўзимни топширайин...  
Улдириингиз, ё менга кўрсатинг меҳр-шафқат!

## Э л ь м и р а

Хисларингизни нозик этдингиз изҳор,  
Лекин, иқорор эдингиз,— мен шундай ҳайрон...  
Лоақал тақводорлик сизни бир қадар  
Тутса бўларди: тақво сизда зўр имон!

## Т а р т ю ф

Айтиш қулай Нима бўбди тақводор бўлсам?  
Мен ҳам одам! Алдашга эҳтиёж йўқ ҳам!  
Муҳаббат иллатига бўлиб гирифтор,  
Қалбимга жонли гўзал энди ҳукмрон —  
Буни билдингми ақл, мантиқ ҳам бекор!  
Майли, бу сўзларимдан — ўйланг девона,

Дейинг-ки, бу сўзларим — том ваҳшиёна;  
 Мен паشا эмасмен! Сеҳрли ҳусн  
 Қархисида бу ожиз банда не қилсин?  
 Мен ўзимнинг ажзимни энди тушундим,—  
 Илгари сукут этиб, кўзларим билан,  
 Хўрсанишларим билан ифода этган  
 Ҳисларни арз этишга букуи уриндим...  
 Оҳ, қаҳрли тақдирим менга ногаҳон  
 Кулиб қараса — баҳтсиз бу қулни сиз ҳам  
 Овутсангиз самимий ноз билан шу он!  
 Сизгагина топинар эдим мен ҳар дам...  
 Сиз мен билан бўлсангиз, ҳар хил таъналар  
 Ва ҳар қандай гийбатдан омон бўласиз:  
 Ҳеч гап-сўз қўзғалмас: мен бир камтар даъвосиз...  
 Лекин бўлади бир нав маҳмадоналар,  
 Ҳавас билан аёллар уларга мудом.  
 Улар учун ғалаба жуда ҳам қулай —  
 Улар ўз ғурурини кўтариш учун  
 Ҳаёсиз мақтанчоқлик билан ҳар қандай  
 Аёлни шармисор қиласар бусбути...  
 Биз эса ибраторуз, гўзал хулқ билан  
 Ҳурмат ва эътиборга бўлдик сазовор.—  
 Сирни пинҳон тутамиз! — Мақтаниш чиндан  
 Бизга заарар: кетади обрў-эътибор...  
 Биз ўзимишни тийиб, сақлаймиз сизни,  
 Шунингчун севиш мумкин хавф қилмай бизни!

### Э л ь м и р а

Сиз кишини аврашга уста экансиз...  
 Аммо, мен ўз эримга вафодор хотин,  
 Ҳамма гапни мен унга айтамен сокин:  
 Ў кўрсинки, текширмай ҳаммани азиз  
 Дўст тутиш оқибати не бўлур экан...

### Т а р т ю ф

Оҳ, йўқ, меним маликам?  
 Айтмагайсиз! Мен тоза самимий севгим  
 Иқрор этдим, мен сизни қилмадим таҳқир!  
 Сизга қараб совуқкон туролмас ҳеч ким —  
 Ўйлаб кўринг! — Қай инсон бўлмагай аспир!..

### Э л ь м и р а

Хожат борми изоҳга! Энди зўр жазога  
 Лойиқсиз, лекин мен сизни аяйман,  
 Бу тўғрида Оргонга ҳеч сўз демаймен:  
 Сиз бунинг бадалига бергайсиз ваъда —  
 Яъни Оргон олдида Марианадан  
 Сиз қатъий равишда воз кечажаксиз,  
 Бундан кейин бу ишга ҳеч бир йўл билан  
 Аралашмайсиз ёлғиз...

### IV САҲНА

Т а р т ю ф, Э л ь м и р а, Д а м и с,  
 (эшик ортидан чиқиб Дамис)

Йўқ, бўлмайди! Бу ишни қиламен эълони...  
 Мен ҳаммасин эшитдим — бизнинг қўлда у!

Биз унинг туфайлидан кўрдик ҳар замон  
Нохушлик ва бекорга эшитдик сўкув!  
Шармсиз алдашларга келди хотима:  
Отам ҳамма сирни билгуси тезда.

### Э л ь м и р а

Кераги борми, Дамис? Уни аяшга  
Мен сўз бердим, буқунги олган сабоғи,  
Бекорга кетмас, ақл кирап бу бошга,  
Мени ҳеч ранжитмади севги изҳори:  
Эрни севар вафодор бир хотинга бу  
Маза-матрасиз гаплар фақат кулунч-ку.  
Эрим нотинчланмасин арзимас гапга...

### Д а м и с

Балки ҳақлисиз... Аммо уни бу дафъа  
Сиз сингари аяшга рози эмасмен:  
Аяш эмас эркалаш, эркалаш-ку бу!  
Зухм бошларимизда эмасми даҳшат?  
Отам унинг сеҳрига гирифттор экан,  
Авлиёлигига ҳам ишонар экан —  
Ана шунгача хавфли бизга у фақат,  
Яхши фурсатни қўлдан берамиз наҳот?  
Умр бўйи армонда кетарман шаксиз!

### Э л ь м и р а

Дамис!

### Д а м и с

Йўқ-йўқ! Сўзингиз бутун кетади бекор!  
Шундай жазм айладим... Буни қиласмен!  
Нима қилмоқ бўлсангиз, сизнинг ихтиёр  
Лекин ўчимни олиб, мен овинаман!

## V САҲНА

Тартюф, Эльмира, Дамис ва Оргон.

### Д а м и с

Аҳ, отажон! Биз сизга эдик мунтазир!  
Марҳамат қилинг яқин: сиз учун мунда  
Яп-янги воқеа бор,— албатта бунга  
Сиз ғоят таажжуб қилғайсиз зоҳир...  
Қаранг бу одамга — у унутган бутун  
Шафқатингизни, хайри эҳсонингизни,  
Ҳамма яхшиликларнинг эвази учун  
Мунофиқларча олчоқ хиёнат қилди.  
Хотинингизга қайноқ севги изҳори  
Қилар экан бу ерда рост келиб қолдим...  
Юмшоқ кўнгилли хотин бу воқеани  
Сиздан яширмоқ бўлди, мен билиб олдим.  
Қўрқмай фош этамен бу авлиёни!  
Сиз отамсиз, бу эса — иккинчи онам:  
Сизга бу сирни очмоқ бўлди вазифам...

### Э л ь м и р а

Мен бояги фикримда қоламен яна:  
Эрга чақаверишнинг борми лузуми?

Бурчимиз бу-мас, балки эр бўлмаса-да,  
Ўзни сақлай билмоқлик — будир муҳими.  
Сиз агар мени жиндай ҳурмат қилсангиз,  
Ҳеч нимани айтмаган бўлар эдингиз.

Чиқиб кетади.

## VI САҲНА

Тартюф, Дамис, Оргон.

Оргон

Ваҳм босди! Қардошим, қандай ҳангома?  
Уларнинг қоралашга асосими бор?

Тартюф

О, шундай! Мен жуда қаттиқ айбдор!  
Мен разилман, ёвуzman, мен осий банда!  
Бутун ҳаётида фаҳш, бузуқлик бисёр!  
Қўтариб урди мени самоват ҳозир!  
Қаршингизда ўлик тан тез йиқиладир...  
Лекин сукут қиласмен. Майли айбланай,  
Ҳар қандай жиноятни мен кўтараман,  
Ерни ўпид оқланишдан ўзни тиямен.  
Уларга ишонингда ҳайданг бу гадой,  
Уятсиз бир алдамчи ва қароқчини!  
Менга бари бир! Менинг шармандалигим  
Кўпаймайди бу билан, бузинг инини.  
Сиз тинглаганингиз ҳам қилас кифоя...

Оргон  
(Дамисга)

Ҳа, бетавфиқ, бу бўхтон билан сен ҳали  
Меним ҳузуримда қоралмоқчи  
Бўлдингми соғ, гуноҳсиз авлиёни-да?

Дамис

Ота, нима? Бугунги каби ҳаёсиз  
Мунофиқлик қилас у, сиз инонасиз?

Оргон

Жим бўл, лаънати вабо!

Тартюф

Йўқ! Мен-чун койиш.

Эҳтимол унга лозим эмас айб тақиши!  
У сизга бермоқда қизиқ маълумот...  
Меним ичимдагини қайдан биласиз?  
Менинг камтар ва ҳақир ташқи қиёфам  
Эҳтимол сизга кўп рост кўрингандир бот,  
Ҳавасларга берилиб кетманг жилла-ям!  
Мен қаерда бўлмайин, ҳамма вақт тоза  
Гуноҳсиз дил соҳиби, деб чиқди номим,  
Аслида энг биринчи ёвуз менманку,  
Филҳақиқат — жуда оз меним қимматим!

(Дамисга)

Ардоқли ўғил, сўзни эттиринг давом!

Ёлғончи, разыл, қотил — айтинг барини:  
 Мен буларга қилмайман эътиroz тамом,  
 Лекин мен қаршингизда тиз чўкиб дарҳол,  
 Ожизона ер ўлиб, гуноҳдан тил лол,  
 Кўз ёшларим-ла тавба қилишга тайёр...  
*(Тиз чўқади.)*

Оргон  
*(Тартюфга)*

О, бу ортиқча!

*(Дамисга)*  
 Қани, аҳволинг қалай?

Дамис

Оҳ, ота, шундай разил, алдамоқчи бўлғай...

Оргон

Сен гапирма!

*(Тартюфни турғизиб)*  
 Қардошим, туринг беозор!  
 Мен жазосин берамен! Ўзи пушаймон  
 Бўлур сўнг... раҳм этингиз...

*(Дамисга)*

Жувон ўл, нодон!

Дамис

Шундай бир дардисарни  
 Истайсиз-ки...

Оргон

Жим!

Дамис

Мен ўзим йўқотдим.  
 Мен нима қилай...

Оргон

Агар яна бирон сўз айтганинг билан,  
 Сени бўғиб ўлдириш — будир ниятим!!!

Тартюф

Биродар! Худо ҳаққи, ғазабланмангиз!  
 Йоз қатла азобга ҳам тайёрмен, лекин  
 Бошқаларнинг азобин кўрмасам ёлғиз...

Оргон  
*(Дамисга)*

Ношукур!

Тартюф

Ва унинг ҳам гуноҳи учун,  
 Оёғингизга ётиб, ёлворай бурун...

Оргон

*(Тиз чўқиб Тартюфни қўчоқлайди).*

Ёраб! Ёраб! Етмаган эди бу аҳвол!

(Дамисга)

Кўрасенми?

Д а м и с

Лекин...

О р г о н

Гапирма!

Д а м и с

Ҳа, мени...

О р г о н

Жим!

Ҳамма иш англашилди менга бемалол.  
Бундан пафрат қиласиз. Ҳеч истисносиз —  
Ҳаммангизга бир бало эмиш бу ожиз.  
Бир илож қилиб бизни уриштиргани,  
Ҳар бир нарсани дастак қиласиз яна..  
Лекин мен, азиз дўстлар, унчалик содда  
Эмасман... Сиз қанча кўп уринманг ҳали  
Мен эса унга шунча бўламен яқин!  
Сизни тезроқ ювош қилиш-чун тағин  
Тўйни ҳам тезлатамен.

Д а м и с

Ҳамширамни наҳотки қилсангиз мажбур...

О р г о н

Шундай ўйим бор! Бугун етар машмаша!  
Сизни қўлга оламен, ким бу уйга бош?  
Жуда ҳам эрка бўлиб кетибсизлар-да!  
Қани, оёқларига йиқил, дилозор,  
Айбингни сўраб ёлвор!

Д а м и с

Мен яна сажда қилай шу мўлтонига?

О р г о н

А! Үжарлик этасен! Үзбошимчалик!  
Қани таёқ?

(Тартюфга)

Сўраймен, қилманг монелик!  
Мен уни...

(Дамисга)

Кет бу ердан! Шу минутда-ёқ!  
Мен сенинг қорангни кўрмайин ҳатто!

Д а м и с

Кетамен... Лекин...

О р г о н

Йўқол! Ўғлим йўқ асло...

Мен сени меросдан ҳам маҳрум этамен!  
Бу ҳам оз, лаънати... Сени оқ қиламен!

(Дамис кетади.)

## VII САҲНА

Тартюф ва Оргон.

Оргон

Шундай таҳқирлаш! Яна таҳқирланган ким!

Тартюф

Тангри марҳамат этиб кечирсин уни!  
Ишонасизми, қардош, мени нақадар  
Эзмоқдадир мана шу ғазаб тўлқини!

Оргон

Тушунамен!

Тартюф

Дилимни озорлар! Оғир!  
Ахир мен қай бирига етказдим заар?  
Ёмонликка — яхшилик бу одатимдир,  
Тама билмаган, йўқсиллигимдан магар?  
Нима бўлди? Ва рангим ўчганми ҳозир?  
Кўз олдим сиёҳ... Сизни кўзим илғамас...  
Ҳозир ўладиганга ўхшаймен... бирпас...

Оргон

(Дамис чиқиб кетган эшикка кўз ёшлиари билан югурлади)  
Ҳа, бахтиёр экансен! Бир оз турсайдинг,—  
Еруғ жаҳондан кўзни мангуб юмгайдинг!

(Тартюфга)

Ҳушингизга келинг, азизим, жоним...

Тартюф

Йўқ! Кўрамен, бу аҳвол этолмас давом,  
Мен бу ердан жўнашим керак шу оқшом:  
У вақт уйингизга тинчлик бўлади ҳоким...

Оргон

Ҳазилмӣ!

Тартюф

Мунда мени кўра олмайдилар —  
Тезда бошимга бошқа кулфат солғайлар,  
Яна не нарсаларни тўқишар бир кун!

Оргон

Уларни тингламоқчи эмасмен бутун!

Тартюф

Улар ўжар: истаган замон —  
Тинглатишар... Бунга ишонамен-чин!

Оргон

Бўлмас ҳеч қачон!

Тартюф

Қардошим, лекин

Биласизми, ҳар аёл бир табассум-ла  
Эрнинг дилига ҳоким бўлур бир зумда...

Оргон

Йўқ, йўқ!

Тартюф

Рухсат этингиз, кетамен бундан!  
Мен йўқолгач тинчишиб қолишади жуда...

Оргон

Ҳалок бўлайми! Сизсиз яшаш беҳуда.

Тартюф

Тайёрмен ҳар жафога —  
Лекин агар...

Оргон

А?

Тартюф

Хўп, шундай бўлсин! Майли қўяйлик...  
Энг кичик бир бўхтондан қутулиш учун  
Ўзни қандай тутишни бу шахс билгуси:  
Сиз шу кундан ҳеч қаҷон  
Кўрмайсиз мени бир он  
Хотинингиз ёнида...

Оргон

Йўқ, учрашиб турасиз!  
Мумкин қадар тез-тез! Майли кўрсинлар,  
Ҳовлиқиб қоврилсинлар, дардга тўлсинлар —  
Менга бу нарса эрмак бўлади ёлғиз!  
Тайёрлаймен уларга манов совғани:  
Уларни ниҳоятда қаттиқ қийнамоқ,  
Юракларига солиш учун оловни —  
Ягона меросчўр деб билай муҳаққақ...  
Хўш, ўзингиз айтингчи: тайинлай кимни?  
Билмайсизми? Ё раббим! Кимдир у одам,  
Ҳаммадан яқин, азиз борми бир ҳамдам,  
Тайинлаймен бўлажак ўз куёвимни!  
Дўстим, бу фикримга сиз ҳам рози-а?

Тартюф

Ўз фақир қисматимда, ҳар нимада ҳам  
Бўйсунамен тангрининг ихтиёрига...

Оргон

Бу жуда соз! Демакки қўл бериш мумкин!  
Энди биламен — бизни бир-бирдан жудо  
Қилажак нима бордир! Юринг мен бутун  
Ишни сизга топширай расмий йўсингда:  
Ҳасад ё ғазабдан бари куйсин ўт аро!

## Тўртинчи акт

### I САҲНА

Тартюф ҳам Клеант.

Клеант

Бу тўғрида сўзлайди ҳамма ошкор,  
Ҳисоблайлар ҳар жиҳатдан сизни айбор,  
Ўйлайман-ки яшириш буни беҳуда,  
Биз икир-чикирини суриштирумаймиз,  
Ишни дангал қилиб фикр қилгаймиз —  
Фараз қилайлик иш ёмон: ҳар бир нарсада  
Дамис айбор бўлсин... лекин отанинг  
Даргоҳидан бир ўғил оқпадар бўлиб  
Қувилишига хурсанд бўласизми чин?  
Қулок солинг! Диндорсиз, яна айталар:  
Намуна, тимсол бир зот эмишсиз тағин,  
Ҳамма ер, хешлар учун, ҳар соат, ҳар он.  
Тайёрмишсиз жонингиз қилишга қурбон...  
Хўш, олижанобликни қилингиз исбот!  
Энди ташланг ғазабни! Унутинг шу дам  
Ҳақоратни! Уч эмас, диний афв қарам  
Орқада ғалабага сиз эришингиз!

Тартюф

Эвоҳ! Кўл силтар эдим бу ишдан буткул!  
Ранжиш, фахрланишини тез унутамен,  
Дамисга ҳеч қандайни! кек сақлаймен...  
Лекин тангри қошида бўлмагай мақбул.  
Мумкин эмас Дамиснинг қайтиб келиши:  
У уйга қайтса — уйдан дарҳол кетамен.  
Ёки чиркин бухтонга бўйсунмоқ керак.  
У вақт менга қайралар ҳамманинг тиши.  
Ҳамма айтар: ҳа, мана гап қайдა экан!  
Дамистан ҳадиксираб чиқибди жони!  
Сирни Дамис ичига ютсин, деб чоғи  
Мунофиқона ўзини очиб берди у!

Клеант

Бемаза далиллар бу: ҳеч нимарсанни  
Қилмади исбот!  
Сўзаро қистирдингиз тангри, самовот...  
Лозимми бу? Айтингиз, сиздирсиз балки  
Бизга юборилган у осмон жаллоди?  
Қизиқ гап! Унутайлик уларнинг барин,  
Ҳаддимиз борми бунга! — Яхшиси бизлар  
Виждон билан ҳақиқат йўлин тутайлик.

Тартюф

О, тангрим! Мен ҳамиша шундай қиласман.  
Дамисни афв этганман... Лекин у билан  
Яна бирга яшамоқ — бу гуноҳ ахир.  
Бу тўғрида ўйлашга эмасмен қодир,  
Эркимни бўғишга йўқ ҳеч кимнинг ҳадди...

## Клеант

Меросхўрлар мулкига панжасин солиш,  
Бутун бир оилани кулфатга отиш —  
Буни гуноҳ деб сира ўйламайсизми?

## Тартюф

Мени айтганларнинг ҳеч бирида ҳам  
Бўлмайди зарра қадар бунга шак, гумон:  
Менда бир тами бордир, ё мен ўлармон:  
Аксинча, дедим: мерос ёмон бир одам  
Қўлига ўтмасин ва ҳеч кимни ёмон  
Иўлларга бошламасин, қабиҳ иш томон  
Судрамасин, деб қабул айладим уни!  
Қарорим шу: барини мен улашаман,  
Худо йўли савоб ишга барин сочаман...

## Клеант

Баракалла! Пуч хавфлар нимага даркор?  
Мерос кимники бўлса, қўлига илсин,  
Истаса, у номаъқул ишларни қилсин:  
Тўгриси, сизга бундан нима зарап бор?  
Чўчитмаслиги керак сизни бу нарса,—  
Нима дейсиз — талончи деб ном қўйсалар,  
Тавба қилишга мажбур этсалар агар,  
Савоб ва талончилик —  
Бирлаштириб кўринг-чи! Қулай эмас-да...  
Хўп, яхши! Дамис билан яшай олмайсиз?  
Разил қораланишдан кўра, обрўни  
Қўлдан бермай ўзингиз жўнаб қолсангиз,  
Бу яхши бўлмасмиди?  
Чақирамен инсофга сизни бир йўли.

## Тартюф

Кечирасиз! Суҳбатни узишим даркор:  
Муқаддас вазифам ундайди мени.  
Тоат-ибодат вақти етибди...

Чиқиб кетади.

Клеант  
(ёлғиз ўзи)

Айёр...

## II САҲНА

Клеант, Эльмира, Мариана ва Дорина.

## Дорина

Аҳ жаноб, ёрдамингиз зарурдир бизга,  
Изоҳга ҳожат йўқ, бир қаранг қизга:  
Бечоранинг жуда ҳам кетди мазаси,  
Улимдан даҳшатлидир у никоҳ сабил!  
Хўжайнимиз ҳозир келиб қолади,  
Унинг бу абллаҳона қарорин бекор  
Қилишга кўндиromoқ учун астойдил  
Уринишимиз керак — у кўнгай начор...

### III САҲНА

Клеант, Эльмира, Мариана, Дорина ва Оргон.

#### Оргон

Аҳа, бунда ҳаммангиз жамсизми, кўп соз!  
*(Марианага)*  
 Сенга совға келтирдим, тингла, оппогим,  
 Шартнома тайёр... сенга маълум мазмуни.  
 Бахтили бўл! Кўлдан келган қадар чолищдим...

Мариана  
*(Оргон олдида сиз чўкиб)*

Отажон! Ялинамен ва ёлворамен...  
 Мажбур қилмангиз сира!  
 Айтинг қошингизда гуноҳим нима?  
 Қай айбим-чун бу жазо лойиқ? Биламен  
 Оталик ҳаққингиз... Мен шу дамгача  
 Бўйсуниб келдим сизга худди қул каби...  
 Қайгули ёзмишимда зўрламанг мени  
 Ҳурматни унудишига! Айрилай яна  
 У йигитдан. Балки унга арзимасмен ҳам,  
 Гарчи севаман.... Жуда севамен уни....  
 Бунга куймаймен... Аммо Тартюфга хотин  
 Бўлишга, йўқ! Бунга тоқат қилмаймен бир дам!  
 Бундан кўра ўлганим яхшидир, лекин...

#### Оргон

*(ўз иродасини йўқотган каби)*  
 Оргон! Оргон! Мардлигинг қаерда, қани?

#### Мариана

Тартюфга ҳеч ёмонлик қилмаймен орзу,  
 Барча мулкни беринг унга — мол унинг жони,  
 Биламен, жуда хушвақт қиласар уни мол...  
 Энди кўксимда қолди бир хаёл, армон...  
 Отажон, рухсат этинг! Ёлғиз истагим  
 Умримни монастирда кечирмоқдир жим...

#### Оргон

Ҳа, бобилла!  
 Ишқ әрмак бўлолмайди, бошқа ўйинчоқ  
 Қолмади, энди чилла ўтироқчисан?  
 Қизиқ... Чучварани хом санабсан, чироқ!  
 Тур! Мўъмин-маъқул хотин бўлишга отлан,  
 Менга бемаза гапни кўп валдирама!

#### Дорина

Аҳ, жаноб...

#### Оргон

Хўш? Мен сенга орзумандамидим?  
 Қандай эпчил! Ҳар ишга бурнин тиқар жим!  
 Сени ким чақирди? Қелдинг нимага?

#### Клеант

Рухсат эт, мен сенга берай маслаҳат.

### О р г о н

Кенгашларингга қулоқ солдим ҳамиша:  
Яхши кенгашу баҳога йўқ сира ҳожат...  
Аммо менга керакмас мана бу офат!

### Э л ь м и р а

Таажжубдан эс кетибди, тилим бўлди лол!  
Эшитдинг ҳозир менга нима бўлганин.  
Үйлабдимки, шу нарса кўзингни дарҳол  
Мошдай очиб қўйишга кифоя қиласар!

### О р г о н

Иўқ, азизим, мени алдай олмайсан...  
Агар рўй берса чиндан шундай воқеа,  
Юзингда ўзариш бўлмасди пича?

### Э л ь м и р а

Афтимга қараб ҳукм чиқаргин тағин,  
Аблаҳ севги ҳар қандай аёлни, албат,  
Қизартмайди ва бундан қандай хотин  
Йиғлаб юбориб қилмасин эрга шикоят.  
Биламен орамизда кўпdir шундайлар:  
Уларнинг иши эрлар диққатин тортмоқ,  
Лекин номусларини ҳатто тиш-тириноқ  
Билан сақлашга гулар тайёр тургайлар.  
Уларга иярувдан тангри сақласин!  
Икки оғиз совуқ гап билан ҳар қандай  
Севги изҳорини кесиб қўямен.

### О р г о н

Хўп, майли! Сўзлашишга вақтим йўқ, лекин...  
Ҳар бир иш бўлади нақ мен хоҳлагандай —  
Вассалом!

### Э л ь м и р а

Гап уқтириб бўлмас, нетайин!  
Улгудай ўжарсан! Дўстинг кимлигин  
Агар яққол кўрсатсан, не дерсан у чоқ?

### О р г о н

Ўзим кўрсан?

### Э л ь м и р а

Ха.

### О р г о н

Айтавер!

### Э л ь м и р а

Сен тўхта озроқ!  
Сўзлай сенга.

### О р г о н

Қўйсангчи!

### Э л ь м и р а

Бу қандай қийноқ!

Сен лоақал жавоб бер ушбу саволга:

Фараз қил-чи: мен уни шундай бир ҳолга  
Келтирай-ки, у яна очсин дардини,  
Сен яшириниб тинглаб олсанг барини —  
Нима дер эдинг у чоқ?

### О р г о н

У вақтми? Тўғриси буни билмаймен.  
У вақт... Хўп, нима дердим? Ўйлайман-ки мен...  
Ҳа, ҳеч нима айтмаган бўлар эдим-да.  
Ҳаммаси бўлмағур гап! Кўп тингламаймен...

### Э л ь м и р а

Майли, сўзингдан қайтма! Қолади бир йўл.  
Айёрликни, ҳайлани ишга соламен —  
Сенга лўнда қилиб исбот этамен...

### О р г о н

Бўпти!  
Кўрамиз, ҳали қандай типирчиларсан!  
Менимча майна бўлиб қўлга тушарсан...

### Э л ь м и р а (Доринага)

Бу ёққа чақир уни!

### Д о р и н а

У зийрак, туйфун!  
Фаҳмлаб қолар, келмас — чақиринг ўзингиз...

### Э л ь м и р а

Хотиржам бўл! Кимки севигига дучор,  
Кимки ўз-ўзини йўлдан оздирап —  
Уни қўлга туширмоқ осон. Тез чақир!  
(Клеант ва Марианага)  
Сизлар жўнангиз!

## IV САҲНА

### Э л ь м и р а в а О р г о н

### Э л ь м и р а

Энди манов столни бу томонга сур —  
Ҳам тагига кир.

### О р г о н

Стол тагига?

### Э л ь м и р а

Ҳа киравер!

Сен бутунлай беркиниб олишинг лозим...

### О р г о н

Ахир мен нега стол тагига кирай?

### Э л ь м и р а

Эй, худойим!

Шу керак-да... Лекин менга халақит қилма!

Яхши беркин, ўзингни сира билдирма...

## Оргон

Очиқ гап, аблаҳона лутфкордирмен...  
Аммо меним айтганим чиқар албатта,  
Сени жуда ўхшатиб масхаралармен!

## Эльмира

**Ким кулар — бу масала?**  
(стол тагига яшириңган Оргонга)

Шу маъносиз ўйинга мен бўлдим рози,  
Албатта сенга аён бунинг сабаби...  
Қўзингни очиб қўйиш қўлимдан келар...  
Лекин бу авлиёнгни ёқалаш учун  
Ўзни мұғомбирликка солишим керак.  
Агар қизиқтирамасам уни мен бутун,  
Балки ўзи бошлашдан чўчийди андак...  
Гап шундоқ у хаёл қилиб, дардига  
Дармон топишлигидан бўлсин умидвор —  
Шунда сен ишонасен дўстинг ёлқинли,  
Майин оҳанг билан булбулдек сайрап!  
Лекин сўрайман, бекор мени қийнама:  
Қурбон бўламен — буни яхши уқиб ол...  
Ҳамма сир сенга аён бўлдими дарҳол  
Чиқиб келавер, сира имирсилама —  
Йўқса мен... Келаётир, ўтири жимгина...

## V САҲНА

Эльмира, Тартюф, Оргон (стол остида).

## Тартюф

Билмайман, тўғримикан... Сиз чақирибсиз —  
Хабар берди Дорина...

## Эльмира

Тўғри. Мен ҳозир.  
Айтамен... Сиз эшикни дастлаб ёпингиз.  
Ҳеч кимса эшитмасин, шунда қолсин сир.  
(Тартюф эшикни ёниб, қайтиб келади.)

Бундаги сафоҳатни такрор қилишни  
Истамайман, эсламанг сиз ҳам бегумон,  
Дамис мени шунчайин чўчитди-ки,  
Ўзимни беихтиёёр йўқотдим шу он...  
Уни юпатиб, аста инонтириш-чун  
Мен қанча уриндим, биласиз буни.  
Кейин, қўрқув, хижолат босди бусбутун,  
Қолмади эътирознинг ҳам бирон йўли...  
Ҳар тугул иш силлиқ ўтди у сафар.  
Эрим аввалгидай, ҳатто ундан ҳам  
Ортиқ ишонар сизга —  
Биз ташвишсиз яшаши истасак агар —  
Тез-тез учрашиб туриш лозимдир бизга.  
Ана шунда бизларни пойламас ҳеч ким,  
Эҳтимол, жуда пинҳон учрашиб, жим-жим,  
Худди ҳозиргидай, топишсак ёлғиз...  
Эътироф қиласмен севгимни ожиз...

### Т а р т ю ф

Тушуна олмадим... Ахир яқиндагина  
Муомалангиз тамом бошқача эди-ку?

### Э л ь м и р а

Ха, бошқачайди... Сизни қилдим хафа;  
Аёллар руҳини оз биларкансиз-да!  
Биз ўзимизни кучсиз ҳимоя қилсақ,  
Демак ҳислар кураши бизни эзган чин,  
Кулунж бўлади у вақт қайтиш орқага.  
Ўйлайман, буни англаш ҳеч эмас қийин.  
Дарров қабул этмаймиз бизлар ҳеч қачон,  
Аёллар табиати шундайдир ҳар вақт.  
Севамиз-да тортамиз лекин хижолат...  
Аммо биз ҳақиқатни яшиrolмаймиз —  
Қўнгилнинг ҳавасига тўсиқ йўқ асло!  
Сизга нима десалар, десинлар, бир он  
Тингламанг! Қурук сўзга ишонмас доно.  
Дилнинг чин тўлқинига инонинг ёлғиз...  
Кечиринг! Беихтиёр қизиқиб кетдим,  
Эҳтимол ҳаддан ортиқ кўп гаплар айтдим —  
Лекин бўлгани бўлди! Сўрайман сиздан:  
Сиз менга очиқ айтган гапларингиздан  
Мен таъсиrlанмаган бўлсан у замон  
Ажабо мен Дамисли қайтарармидим,  
Сиз сўзлашга бошлаган чоқда ногиҳон  
Сўзингизни шарт кесиб жўнамасдим,  
Ҳамма гапни бўйнимга мен олармидим?  
Яна ўгай қизимга уйланишингизни  
Эшитиб куя-пиша айнитдим сизни...  
Шунда ҳам ниятимни англамадингиз?  
Тушуниш осон-ку! Шу эди истак:  
Орамизда бўлмасин бошқа бир аёл,  
Қўнглингизга ҳоким бўлай мен ёлғиз,  
Бўлмасин дилда мендан бошқа бир хаёл...

### Т а р т ю ф

Оҳ! Жононнинг тили шундай сайрар-кан,  
Қандай лаззат ва қувонч дилга бағишлар!  
Мен шавқ билан, берилиб уни тинглайман,  
Қўрқамен-ки, бирон сўз чатилмай қолар...  
Сиз томондан севилиш —  
Бутун орзу интилишнинг юксак пояси!  
Мен учун бундан олий йўқдир саодат!  
Лутфу карамингизни қилсан-да ҳурмат,  
Лекин кўнглимнинг бордир андак шубҳаси...  
Бошимга беихтиёр келар шу фикр:  
Кутилмаган марҳамат кўрсатиб, балки  
Бузарсиз Марианага уйланишимни, —  
Бахтни тақдир юборган деб билсан агар,  
Шунда сўзингиз мени ишонтирас чин,  
Сеҳргар сўзлар билан эмас, жонли ноз-  
Эркалаш билан дилнинг севги-фироқни  
Юпатган чоғингизда шубҳа қолмас оз!

**Э л ь м и р а**  
**(Йўталиб, эрига ишора қиласди).**

Вой, мунча шошқалоқсиз! Ҳовлиқиши билан  
 Ҳар бир севги, ҳавасни чўчиши мумкин...  
 Айтганим етар муқаддима учун,  
 Яна ҳозир кўнглингиз не тилар экан?

**Т а р т ю ф**

Хуқуқ, талаб оз бўлса, оз бўларроҳат!  
 Йисон орзуларининг йўқдир поёни;  
 Хаёлда учиш осон, лекин ҳақиқат —  
 Билан хаёлнинг жуда узоқ ораси!  
 Сиз раҳм айладингиз муҳаббатимга,  
 Бунга арзимасам-да, лекин қаршимда  
 Кўрамен янги олам — ер жаннатини...  
 Бахтни бер, ишонтири бу бахтга мени!

**Э л ь м и р а**

Ишқингиз мунча ҳам тизгиниз экан,  
 У билмайди на шафқат, на-да марҳамат...  
 Тўймас экан, иштаҳа зўр экан беҳад!  
 Қўксингизга жо бўлса аёл севгиси,  
 У шўрликка қолмасин нажот бутунлай?  
 Таслим бўлган юракка сиз ҳукмингизни  
 Қаттиқ ўтказишингиз мумкини шундай?

**Т а р т ю ф**

Сиз менга оз-моз мойил бўлсангиз агар, —  
 Хўш, энди сизга нима зўр тўсиқ бўлар?

**Э л ь м и р а**

Сиз худонинг қаҳридан сира қўрқмайсиз?  
 Бу тўғрида кўпинча уқтирадингиз...

**Т а р т ю ф**

Оҳ, ваҳимага солмасин сизни бу фикр!  
 Ишқ бизни унданоқда завқу сафога,  
 Ишқда ўрин йўқ бундай хавфга, жазога...

**Э л ь м и р а**

Лекин, тонгла бунингчун сўрарлар бизни!

**Т а р т ю ф**

Ишонинг — ҳеч нима бўлмас! Илоҳий!  
 Қонунлар мавжуд деб, довдираиди ким!  
 Буларнинг ғовларига учрар ҳар доим...  
 Лекин четлаб ўтишнинг бордир имкони.  
 Бундай ишларни эплаб кетмоқлик учун  
 Одамзод кўпдан буён эпчилдир бутун —  
 Оғир гуноҳларни бажариб инсон,  
 Бошқалар кўзида бўлар пок виждан!  
 Қўрқмангиз, Эльмира, мен ялинаман!  
 Севигига содиқ бўлиб, эргашинг менга.  
 Ҳар бир ишга мен ёлгиз жавоб берамен!  
 Бор гуноҳни оламен мен ўз бўйнимга!

(Эльмира кучлироқ йўталаади.)  
Йўталасизми?

Эльмира  
Ха.

Тартюф  
Мана бу берар шифо  
Йўтал доруси.

Эльмира  
Йўқ менга ёрдам бера олмас бу.

Тартюф  
Йўтал сизни жуда ҳам нотинч қилурми?

Эльмира  
Ҳеч чидаб бўлмайди! Қеча-кундуз шу...

Тартюф  
Ачинамен... Қани, хўш, сиз розимисиз?  
Үйлаб қаранг, ким бор қоралайдиган,  
Бундан ҳеч кимса огоҳ бўлмайди зотан?  
Биз бу ерда сира ҳам хавфда эмасмиз!  
Ошкора гуноҳ қилиш — ёмон нарса-ку,  
Лекин яширин гуноҳ — қандай гуноҳ бу?

Эльмира  
(яна йўталиб, столни тиқирлатади).  
На деяй! Қўнаман-да энди чор-ночор...  
Шундай ҳаракатга рози бўлишни  
Ҳеч-да ўйламаган эдим тўғриси!  
Сизга қарши туришнинг йўқдир имкони:  
Шундай ўжарсиз... Гапга ҳеч ишонмайсиз...  
Керак ҳар бир нарсанинг сизга исботи...  
Нима қилай! Таслимман... Гуноҳи лекин  
Менга эмас: мен ёлғиз орзуга қурбон —  
Жавобгар бўлмаймен бунга ҳеч қачон...

Тартюф  
Дедим-ку беражакман ўзим жавобин!

Эльмира  
Бир қаранг, у ерда эрим йўқмикан...

Тартюф  
Садағанг бўлай! Нега қўрқамиз ундан?  
У шу қадар содда, оқ кўнгил қиши, —  
Биз уни алдаймиз жуда ўхшатиб!  
У яна шундайин менга содиқки,  
Сўзимдан ҳеч чиқмайди... Атрофга боқиб  
Кўрган нарсасин ҳам кўрмаган бўлар!..

Эльмира  
Майли, шундай булса ҳам, сиз бораверинг,  
Атрофни яхшилаб бир қараб келинг!

## VI САҲНА

Эльмира ва Оргон.

Оргон

*(стол тагидан чиқиб).*

Тан бердим! Бориб турган безори экан!  
Бу гапларга ишонар қайси бир одам?

Эльмира

Барвақт чиқа қолдинг, жоним, жудаям!  
Яна тез шу ерга кир, кут охирини:  
Яққол кўрмасдан туриб, қутулмас киши!  
Қапалагинг учиге кетибди, қара...

Оргон

Инсон шундай қабиҳ, ифлос бўлса-я!

Эльмира

Кўрдингми, азизим, дуруст уқиб ол,  
Хато қилиб қўйиш жудаям осон.  
Яхшиси, аввал синааб, шундан сўнг ишон!  
*(Оргонни орқасига яширади.)*

## VII САҲНА

Эльмира, Оргон ва Тартюф.

Тартюф

*(Оргонни кўрмасдан).*

Ҳар ёқни қараб чиқдим, жимжит ҳар томон.  
Ҳеч ким йўқ! Қандай гўзал, хушбахт воқеа!  
Биз тамоман ёлғизмиз... О, бўлай қурбон...

Қучогини очиб Эльмирага яқинлашади; Эльмира четланади — Тартюф Оргонни  
кўриб қолади.

Оргон

Дўстим, бир оз тушинг! Қайнаманг унча!  
А, тақводор пир! Маъсум хаёлларни  
Нималарга тиккансан? Кўриб турибман.  
Отмоқчи бўлдинг икки ҳақорат тоши —  
Маҳв этмоқчи бўлдингми қизим, хотиним!  
Битди! Ортиқ қолмади сабру бардошим!  
Стол остида эдим, — маълум барчаси, —  
Сўз тинглашнинг ортиқ йўқдир маъноси!

Эльмира  
*(Tartюфа)*

Мен нима деган бўлсам, унунинг барин,  
Шундай ҳийлага мажбур қилдингиз лекин...

Тартюф

*(Оргонга)*

Шунга ишонасизми?

О р г о н  
Бас, биродар, бас!  
Йўлдан қолма!

Т а р т ю ф  
Ҳасратим кўксимга сиғмас...

О р г о н  
Айтдим-ку — сўзга ҳеч солмайман қулоқ.  
Жўнаб қол уйимдан сен шу топда-ёқ!

Т а р т ю ф  
Шундайми? Йўқ! Мен эмас сизлар кетасиз,  
Уй — менини. Хўрликка мен чидолмайман —  
Қонуний ҳаққимни тез талаб қиласман:  
Мени шунда танийсиз — шунда биласиз  
Мен билан жанжаллашиб нима эканин!  
Арзимаган гап учун мени паст, ёмон  
Бўхтонга чулгадингиз, туҳматчисиз чин.  
Бунинг учун жазо юборар осмон!  
Бу шармандаликни ҳеч кечирмайман,  
Пушаймон бўласиз кўп вақт ўтмасдан!

### VIII САҲНА

Э л ь м и р а в а О р г о н .

Э л ь м и р а  
Бу нима демак-а? У нима демоқчи?

О р г о н  
Иш ёмон, эс-ҳушни ҳам йўқотиш мумкин!

Э л ь м и р а  
Ҳа, нима бўлди?

О р г о н  
Нима? Азизим, даҳшат!  
Тўғри айтди — гарчи сен мени ўлдир, ос!  
Эшигдингми — гапирди у очиқ ва рост:  
Бу ерда биз эмас — хўжайн удир.

Э л ь м и р а  
Бўлмаган гап!

О р г о н  
Хўп дейвур... яна ҳам оғир,  
Яна ҳам қўрқинчлироқ балолар келгай?

Э л ь м и р а  
Масалан, қандай?

О р г о н  
Сўнг ҳаммасин биласен... Анови қути  
Қаерда экан, бориб билайн уни...  
Шўрим қуриб қолди, ҳолимгавой,вой!

## Бешинчи акт

### I САҲНА

Клеант ҳам Оргон.

Клеант

Қаёққа борасен шошиб?

Оргон

Қаёққа!

Қайдан биламен?

Клеант

Бўлмаса қулоқ сол. Ҳаммамиз бирга  
Йигилиб, нима қилиши кераклигини  
Сўзлашмоқ, ёмон бўлмас дейман...

Оргон

У қути сира  
Кўнглимга тинчлик бермас. Хароб бўлибман!

Клеант

Шошма, нима бор эди унинг ичидা?

Оргон

Бир вақтлар нима бўлиб, мен сирдан уни  
Воқиф қилган эдим, чидай олмасдан, —  
Чунки дилни жуда ғаш қилганди қути...  
Шунда у муттаҳам солди қўрқувга,  
Дедики: ўҳ, бу нарса хавфлидир жуда,  
Мен бўлсам ўлгудай бепарво, лақма,  
Билиб қолсалар ногоҳ — ёмон воқеа...  
Қутини яшириб қўйгандан кейин  
Майли тергов қиласинлар — «Туя кўрдинг? — «Иўқ!»  
Бундай ёлғондан-да тап тортма лекин,  
Чунки бу гуноҳ эмас — бўлсин кўнглинг тўқ...

Клеант

Ҳа, сен ўз-ўзингга ортдинг фалокат!  
Бу нарса мени ҳам ташвишга солар.  
Кўрган чоранг кескинтир ҳаддан ташқари  
Бир оз чидаб муғомбир бўлиш даркорди,  
Энди у сендан қаттиқ ўчини олар!

Оргон

Хўп ўхшатди-да бизни! Лаънати илон!  
Ғамхўрлигим, диққатим ва эркалашим,  
Хайри эҳсоним қадрин билмади шайтон!  
Ҳайвон! Саёқ, ўғри. Энди ҳеч қачон  
Бу дарсни унутмайман, мен абадиян  
Таъзиримни едим! Бунга ўхшаган  
Жанобларга ортиқ йўқдир алданиш:  
Улар учун шайтондан баттар бўламан!

### К л е а н т

Ифротчилик керакми? Сени у айёр,  
 Қўлга туширибди — бунга ким айбор.  
 Қўшиламен, пешананг тошга тақ тегди...  
 Бошга тушган бало кимга хуш ёқар...  
 Тартюфни қарғайвер! Ўзгалар нима?  
 Бир разилни кўриб ҳалқ орасида —  
 Ўйласакми ҳамма ҳам шундай экан деб?  
 Дўстим, сен кўп қизишма, шу гапим тингла:  
 Биргина ярамасни мисолга олиб,  
 Ҳамма одамларни аралашига  
 Қораламоқдан кўра, ҳадсиз ишониб,  
 Қўнгилчанлик қилиш, баъзан қўлга ҳам тусиши,  
 Албатта яхшироқ иш...

### II САҲНА

*Клеант, Оргон ва Дамис.*

Д а м и с

Отажон, нима гап? Ишониш қийин!  
 У баркирдор сизга дўқ қиласми чин?

О р г о н

Ҳа, шундай, азиз ўғлим! Яқин орада  
 Бошимизга зўр қайғу тушар албатта...

Д а м и с

Безорининг таъзири ин бераман ҳали!  
 Шилқимлигини мангубосиб қўяман!  
 Бутун оила учун ҳисоб оламан...  
 Уни чала ўлик қилиб ураман!  
 Соғ қолмас калтагимдан унинг гавдаси!

К л е а н т

Шошма, ҳовлиқма! Ёшсан, қизиққонсан ҳам...  
 Эсингни йиғ, ўзингни совут бир қадар —  
 Муштумларнгни сен пеш қилма жилла-ям!  
 Иним, замон бошқача: муштлашиш учун  
 Қатъий жавобгарликка сени торталар...

### III САҲНА

*Клеант, Оргон, Дамис, Пернөль хоним.  
 Эльмира, Мариана, Дорина.*

П е р н е л ь х о н и м

Мумкин бўлмаган гаплар эшитмоқдаман.

О р г о н

Мумкинмас деб ўйлаган эдим ўзим ҳам —  
 Лекин кўрдим, ишондим энди чинакам...  
 Қўнгилчанлигим учун жазоланаман!  
 Гадой экан мен парвариш қилай уни,  
 Оғамдек эркалай-да, берай мўл совға,  
 Қизимни, мол мулкимни берайин, тавба,  
 Ўнималар қиласди? Қароқчи каби,

Ифлос ният билан хотинимни у  
Йўлдан оздиришга уринибди-ку!  
Бу ҳам оз! Ҳуқуқига тўла ишониб,  
Менга дўқ ҳам қиласди: ўзи илгари  
Қандай ифлос қашшоқ бўлса, шу каби  
Қашшоқликка мени ҳам судрар зўр бериб!

## Дорина

Бечора!

## Пернель хоним

Йўқ ишонмайман! У шундай ёмон,  
Шундай виждонсиз-ча ҳаракат қилсин!

## Оргон

Ишонмайсизми?

## Пернель хоним

Ҳар бир пир ва пок инсон  
Ҳасадга қолар ҳар вақт — бу кўпдан аён.

## Оргон

Мана бу сўзларнинг маъноси нима?  
Тушунмайман, нимага алоқаси бор...

## Пернель хоним

Сен тушунмасанг агар, тушунар бошқалар!  
Ундан нафрат қилишлари бежиз эмас-да!

## Оргон

Нафрат нима қилсин?

## Пернель хоним

## Ҳамиша

Меним насиҳатим шулки ҳаммага:  
Фазилаткор одамга дард-аламдир насиба,  
Ҳасадчилар ўлади, ҳасад ҳеч ўлмас!

## Оргон

Онажон, фикрингизга қўшиламен, рост...  
Лекин бошқа илож...

## Пернель хоним

Кўп сафсаталар  
Эшитарсен ҳали...

## Оргон

Мен ўзим қўрдим,  
Англанг, онажон,

## Пернель хоним

Ҳа, кимда ғазаб қайнаса,  
Ана унда ғийбат бўлур бепоён!

## Оргон

Ё, худо! Мен ахир дедим-ку сизга...

П е р н е л ь х о н и м

Аҳ, одамларнинг тили шунчалик заҳар,  
Бу заҳарга даво йўқдир муқаррар!

О р г о н

Демак, тушуниш қийин бир-биримизга!  
Шу кўзларим-ла кўрдим! Эшитасизми?  
Ҳаммасини кўрдим! Тушунасизми?  
Ёки мен овозимни барада қўйиб,  
Айни сўзларни такрор қиласай бўкириб!

П е р н е л ь х о н и м

Нима бўлибди хато қилиш сен учун.  
Шунча қийинми? Кўрган нарсангни оз-моз  
Ўйласанг, бошқа бўлиб чиқиши мумкин.

О р г о н

Тоқат бўлди тоқ!

П е р н е л ь х о н и м

Одат бўлибди бизга  
Яхшилик ўрнида ҳам ёмонлик кўрмак!

О р г о н

Меним хотинимга очаркан қучоқ,—  
Таъсирланиб кўз ёшим тўкишим керак?

П е р н е л ь х о н и м

Қоралашчун бу нарса кифоя қилмас,  
Хўп синааб, ишонишинг керак эди-да!

О р г о н

Хўп синашми? Демакки... О, жуда маъқул!  
Мен алданган ҳамда кўр эканман жуда?  
Кутиб туришим керак экан — токи ул...  
Йўқ, онажон, бу гаплар тамом беҳуда!..

П е р н е л ь х о н и м

Қўнгли шундай покиза бир инсон хотин  
Ҳуснига астойдил қизиқа олсин —  
Буни ўйлашни ҳам ҳеч истамайман!

О р г о н

Сиз онамсиз... На қиласай! Бир сўз демайман...  
Шуни билинг, ўзимни тутамен базўр!

Д о р и н а

Ишонмагандингиз бизга бир умр,—  
Энди сизга ишонч йўқ! Экканингни ўр!

К л е а н т

Бу ерда бекор вақтни ўтказмоқдамиз.  
Бирон чора топишнинг келибдир чоги:  
Ҳазиллашмоқ хавфидир — у разил, беор.

## Д а м и с

Үйлабсизки, у яна борар юқори?

## Э л ь м и р а

Менга қолса, ўринсиз беҳуда ваҳма:

У яна бир озгина дўқ қилади-да

Тинчийди кейин.

## К л е а н т

Ийқ, йўқ, ҳазир бўл, Оргон!

Унинг қўлидаги қуроли ёмон!

Тепангда ҳоким бўлиб қолди у баттар.

Инсон бошига баъзан

Арзимаган нарсадан тушар кулфатлар,

Анчайин иш эмас бу, фош қилса — бало!

Такрор гапираманки, сен ўз-ўзингни

Тийишинг керак эди, қилмай можаро.

## О р г о н

Яхши тушунамен барча сўзингни...

Лекин жаҳлимни у чиқарди шундай,

Ҳар нарсани унутиб қўйдим бутунлай.

## Э л ь м и р а

Бўлмас эди шундай талон-тўполон,

Яширмасанг эди агарда мендан...

## О р г о н

(Кираётган Лоялни кўриб, Доринага).

Ким келаётир? Етар ушбу ҳаяжон!

Қара, бил! Айт, бугун қабул қилмайман...

## IV САҲНА

К л е а н т, О р г о н, Д а м и с, П е р н е л ь хоним, Э л ь м и р а,  
М а р и а н а, Д о р и н а в а Л о я л ь.

## Л о я л ь

(Дорина ичкарида)

Салом, попук қизим! Хўжайнинг билан

Кўришмоқ тилардим...

## Д о р и н а

У шунда, лекин

Қабул қилмайди фақат...

## Л о я л ь

У билан бир шингил

Гаплашаман... Сирайм олмайман вақтин!

Биласанми, биргина иш бор — хушхабар

Келтирдим, сен усталик билан шипшитгили!

## Д о р и н а

Сиз ким бўласиз?

## Л о я л ь

Қув қиз, айтки шу чоқда

Жаноб Тартюф юборди мени бу ёққа

Д о р и н а  
(*Оргонга*)

Қандайдир лаганбардор! Тартюфингиздан  
Юмуш билан келибди. Сизга хушхабар  
Келтирганин айтди...  
Рухсат тилайди сиздан.

К л е а н т  
(*Оргонга*)

Қабул эт! Зиёnsиз бу.

О р г о н

Агарда келишувни таклиф этса у?  
Мен кўнмайман... Ич-тошим бутун ларзада...

К л е а н т

Сен аччиғланма, уни тингла безарда!

Л о я л ь  
(*Оргонга*)

Жаноб, ҳурматлар бўлсин... Уйингизни ҳақ  
Асрасин балолардан ва душманлардан!

О р г о н  
(*Клеантга секингина*)

Нафасим ҳам бекорга кетмайди шу чоқ:  
Афтидан ярашувга у тайёр экан.

Л о я л ь

Мен сизга ёт эмасман. Сизнинг мавқедор  
Отангизга ҳам эдим содиқ хизматкор...

О р г о н

Шундай денг! Кечирасиз... Очиқ айтайин,  
Юзингизга қараб танишим қийин!

Л о я л ь

Қамина — Лояль, суд пристави.  
Соф виждоним билан сизга айтаман:  
Қирқ йилдан бўён ҳалол хизмат қиласман —  
Ҳасадчиларнинг мендан қайнайди шўри.  
Топширишим керак сизга ниҳоят  
Кичик бир повестка... Қилинг марҳамат!

О р г о н

Повестка? А! Мумкинми, бу нима демак...

Л о я л ь

Ғазабланмангиз — сиздан шудир илтимос!  
Даҳшатли бир воқеа бўлмаса керак.  
Повесткада ёзилган мана шул холос:  
Оилангиз билан шу уйдан тезроқ  
Чиқишиларингиз лозим — ҳамда бу ерда  
Қанча мол-жиҳоз бўлса чиқаринг эрта...

О р г о н

Мен бу уйдан чиқайин?

## Л о я л ь

Нақ айтганингиз.  
 Суд ҳукми бу! Бироннинг машмашаси-мас,  
 Биласизми, барча ую жойингиз  
 Энди кимга ўтибди... Шудир ҳолингиз.  
 Муоҳида мендадир: бўлсин минг ҳавас!  
 Лекин ўчакишишмоқлик ҳеч мумкин эмас!

Д а м и с  
*(Лоялга)*

Сурбетлигингиизга ҳеч ҳайрон қолмайман!

## Л о я л ь

Жаноб, мен арзимни сизга айтмайман —  
*(Оргонни кўрсатиб)*  
 Мен шахсан бу кишига: сўзимни англаб,  
 Менга қарши туришини қилмаслар орзу...

О р г о н

Лекин бир нарса бор...

## Л о я л ь

Ха, ҳа! Тезда батамом  
 Қиламиз барча ишни — мақсадим ҳам шу.  
 Сиз — номусли граждан, мудом нимани  
 Қонун талаб қилса, мен ижро қиламан,  
 Бу ишда ҳар тўсиқни ортиқ биламан...

Д а м и с

Бошингиизда ўйнаганми бирор вақт таёқ?

Л о я л ь  
*(Оргонга)*

У тилин тийсин, ёки жўнасин илдам!  
 Не бўлур ҳақоратларин протоколга ёзсам?  
 Гарчи истамасам-да сизни қайғуртмоқ.

Д о р и н а  
*(четга)*

Ростин айтсам, ана шу қонунфурушда  
 Ҳеч қонунга сифмаган шаклу шумойил!

## Л о я л ь

Яхши одамлар билан мен шул равишча  
 Дағал муомала қилиш одатим эмас.  
 Бу феълимга ҳамма ҳам қолади қойил.  
 Сизнинг бу иш қўлимга кириши учун  
 Мен жўрттага уриндим, кўп ғайрат қилдим.  
 Бошқа одам бу ишга қунт этмай бутун,  
 Дағал, чала-чулпа қилишин билдим...

О р г о н

Бу озми бутун бошлиқ бир оилани  
 Уйдан ҳайдайсиз

## Л о я л ь

Сизга беряпман фурсат:

Эртага қолдираман иш ижросини,  
 Лекин ҳар ҳолда бунда сизни назорат  
 Қилиш учун кўп эмас, фақат  
 Ўнта навкар билан уйда тунайман.  
 Улардан ҳеч кишига етмайди озор —  
 Хотиржам бўлинг... Бизлар фақат юзаки  
 Расмиятга риоя этишимиз даркор:  
 Ҳамма уйлар калитин ёнга соламиз:  
 Тонг отдими — дарровда йўлга равона!  
 Бизга басдир бу уйни тез бўшатсангиз,  
 Ҳатто одам бераман ёрдам этгали.  
 Мендан кўра лутфкор бўлмоқ кўп қийин:  
 Буни назарда тутиб, берингиз буйруқ, —  
 Токи менга ҳеч кимса бўлмасин тўсиқ,  
 Бирон ишда чурқ этиб оғиз очмасин...

**О р г о н**  
*(Клеантга)*

Қўрмаганман бундайин чиркин башара:  
 Мен энг сўнгги чақамнинг баҳридан кечиб,  
 Қани кучукваччадай юборсам тепиб!

**К л е а н т**

Бекорга аччиқланма, фойдасиз зарда!

**Д а м и с**

Қўлларим шундай қичир — тоб бериш маҳол...  
 Қўрқамен, оқибати бўларми ёмон!  
 Сабр этмоқ душвор...

**Д о р и н а**  
*(Лоялга)*

Фурсат келар эҳтимол,  
 Хўп уриб, терингизга тиқарлар сомон!

**Л о я л ь**

Ҳай, сулув, қараб ғапири! Аёлларни ҳам  
 Судга тортиш мумкин... Ҳам оғир жазо...

**К л е а н т**

Менимча, ҳангомани битирмасанг шу дам:  
 Эрталабгача бизни тинч қўйинг, мирзо!

**Л о я л ь**

Хайр, хуш қолинг, сизга баҳтлар тилаймен...

**О р г о н**  
*(унинг орқасидан)*

Сени бу томонга юборган беор  
 Маҳлуқ билан бирга бўлгин қўшмозор!

**V САҲНА**

Клеант, Оргон, Дамис, Пернель хоним, Эльмира,  
 Мариана, Дорина.

### Оргон

Хўш, онажон? Сиз учун яна қандайин  
Далиллар керак? Менга ишондингизми?  
Энди тушундингизми мен қандай хоин  
Илонни кўксимда асраганимни?

### Пернель хоним

Мен худди туш кўргандай... Бу — тушми, ё чин?

### Дорина

Нега у бечорани шу қадар ёмон  
Қарғайсиз? Менга қолса қарғаш беҳуда!  
Унинг саи ғайратин билмайсиз чандон.  
Одамларни мол-бойлик бузади жуда.  
Сизга нажот йўлин тўсувчи ушбу  
Бойликтан қутқармоқни ўйлагандир у!

### Оргон

Жим бўл! Сўзлашим керак сенга юз марта?

### Клеант (Оргонга)

Манави маслаҳатга бирдам қулоқ сол...

### Эльмира

Менимча бу қаллобликни тезда ҳаммага  
Ёйиш керакдир, шунда билинар аҳвол —  
Ҳамма англайди қаттиқ алданганлигинг,  
Шартномага шак билан қарашар кейин.

## VI САҲНА

**Валер, Оргон, Пernель хоним, Эльмира, Клеант,  
Mariана, Дамис ва Дорина.**

### Валер (Оргонга)

Ана, жаноб, сизниң учун даҳшатли хабар!  
Айтишга тилим бормас... Лекин бир зум ҳам  
Тўхтамай қочиш керак — тез мумкин қадар!  
Бир яқин дўстим шуни билдириди шу дам:  
Қиролга борибдию у ўғри-саёқ  
Ҳаққингизда бўҳтон қилиб чақибди —  
Қандайдир қоғозларни ҳам кўрсатибди:  
Назоратга олиб сизни қамамоқ  
Учун тайёр бўлмиш тегишли фармон...

### Клеант

Шундай зўр жасоратни ундан ҳеч қачон  
Кутмаган эдим мен!  
Мергандек мўлжалга жонин уради!

### Оргон

Одам деб юрибмиз уни биз ҳамон!  
Йўқ, одам әмас, у қабиҳ бир маҳлуқ

### В а л е р

Сизга ялинамен — сустланманг аммо!  
 Эшикда аравам сизни кутади...  
 Мана бунда минг олтин, вақти-соати  
 Қелса ҳисоблашармиз... Жаноб тезгина  
 Йўлга тушмоқ керак! Мен сизнинг била  
 Борамен... Сизни пухта яшириб  
 Қўймагунча келмайман сиздан айрилиб...

### О р г о н

Сизга қандай билдирсам миннатдорлигим?  
 Бунга сўз йўқ, вақт ҳам йўқ... билингиз лекин  
 Юз қатла яхшилик қилмоқ ниятим —  
 Фақат бош омон бўлса... Хайр, кетайин!  
 Сизларни паноҳида сақласин тангри!  
 Сизга топшираман ниманки бор...

### К л е а н т

Деганингни қиласиз — ўзингни қутқар!

## VII САҲНА

**Клеант, Оргон, Дамис, Пернель хоним, Эльмира,  
 Мариана, Дорина, Тартюф ва Полис.**

### Т а р т ю ф

Қўпирманг, жанобим! Шошқоқсиз ортиқ!  
 Узоққа кетолмайсиз: мана бу фармон,  
 Турмага элтадилар сизни шу замон...

### О р г о н

Бадкирдор! Риёкор хоин! Бетавфиқ!  
 Шу биланми етмоқчи бўлдинг тагимга?  
 Не даркор! Разолатни аъло бажардинг!

### Т а р т ю ф

Мен бутун ҳақоратни тинглайман сокин:  
 Лаззат беради тангри қайғу-ғамимга.

### К л е а н т

Эшилдингизми, қандай олижаноб у?

### Д а м и с

Уялмасдан тилга олар тангрини!

### Т а р т ю ф

Ҳеч нима ҳақорат қилолмас мени —  
 Қуқаддас вазифамга мутеман мангу...

### М а р и а н а

Гўзал вазифа! Бундан фахрланасиз?  
 Қанчалик бегараз тама ўйламадингиз?

### Т а р т ю ф

Менга шундай эътимод, ишонч бўлса-ю,  
 Яна мен фахрланмай, чекайми қайғу!

### О р г о н

Унутдинг, ионкўр, барча яхшилигимни?  
Миннатдорчилик билмас ионкўрнинг дили?

### Т а р т ю ф

Мен унутмадим, лекин менда энг юксак  
Вазифа бордир: унинг илоҳий кучи  
Авлалги ҳисларни бўғди бир йўли —  
Мен у вазифа-чун қиласдим қурбон  
Ёлғиз дўстни, хотинни, ота-онадан  
Азиzlарни-мас, ўзим бағишлардим жон!

### Э л ь м и р а

Мунофиқликка қара!

### Д о р и н а

Ўзи шундоқ  
Қандай айб ағдарма — жавоб тайёр-да.

### Қ л е а н т

Рухсат этинг! Сиз шундай мискинлар каби  
Вазифангизни ҳурмат қиласр экансиз,  
Ботирона даъвонгиздан ўз хотинини  
Ҳимоя қилибди у — бунга на дерсиз?  
Оқланишга ҳеч қандай йўл қолмаганда,  
Белни боғладингизми чақиқ-бўҳтонга?  
Унинг молу мулкини усталик билан  
Қўлга киргизибсиз — мен бу тўғрида  
Сизга ҳеч нимарса айтмоқчимасман,  
Майли шундай бўлсин! Аммо бу нима,  
Модомики қонунни бузган бир одам  
Тегишли жазони тортсан дейибсиз,—  
Модомики, муқаддас вазифангиз ҳам  
Бажарилибди — нега садақайисиз?

### Т а р т ю ф (Полисга)

Бас эзмалик, фармон қилингиз ижро!

### П о л и с

Вақтида эслатдингиз: топшириқни нақ  
Ижро қилиш пайти етибди, аммо,  
Мен сизни элтаман турмага шу чоқ,  
У ерда сизга кўпдан жой ҳам муҳайё.

### Т а р т ю ф

Турмага, меними?

### П о л и с

Ха, сизни.

### Т а р т ю ф

Не учун мени?

### П о л и с

Тушунтиргин дейсизми бунинг сабабини?

## (Оргонга)

Жанобләри, қўрқмангиз. Битди фалокат.  
 У оғзини очиб сўзлаган ҳамон  
 Қиролга барчаси бўлиби аён,  
 Яъни алдангансиз қаттиқ, беомон...  
 Ва билинганки, бу иш ўғрилик фақат.  
 Бунинг жазосини у тортади албат:  
 Ёмон ният билан сизга қазиб чоҳ,  
 Қутилмаганда ўзи йиқилди гумроҳ,  
 Унинг ишлари энди чиқди чиппакка!  
 Бу машҳур додгули-ку! Биз кўпдан буён  
 Зўр бериб уринардик уни тутмоққа:  
 Бошқа ном — лақаб билан у бизга таниш...  
 Ҳамма қилмишларини қийиндир айтиш —  
 Агар уларни тасвир этсак батафсил,  
 Жилд-жилд китоб бўлар балки ҳар фасл,  
 Уни тоза расво қилиш мақсади  
 Билан бу ерга келдим, бошқа сабаби:  
 Қирол сизни кечирганин ва сизларга чин  
 Фалокатли шартномани бекор қилганин  
 Билдириб қўйиш эди!  
 Сиздан осий дўст кўмак олган бўлса ҳам,  
 Ўтмиш хизматлар учун шафқату қарам —  
 Ёғилиб келди, қаранг, кутмаган чоқда,  
 Эзгу ният нечоғлиқ баланд ардоқда —  
 Қирол қандоқ қадрлар, кўнгли нақ дарё,  
 Эл билсин: яхшиликни унумтас асло...

## VIII САҲНА

Оргон, Клеант, Дамис, Пернель хоним, Эльмира,  
 Мариана, Дорина, Валер.

## Клеант

Тинчланинг, куёв!

Обрўйингизни ерга урмасин бу дов.  
 Сўз на ҳожат, Ақл дер: ғазабингни бос!  
 Ииглагулик тақдири — қилмишига мос.  
 Тавбасига таяниб то бу шармисор,  
 Яхшилик ва хайр ишга йўл олиб такрор,  
 То разил ўтмишига иқрор бўлса чин,  
 Майли дeng, гар ҳукмдор юмшатса ҳукмин.  
 Улуғ ҳукмдор сизга раҳмидил бисёр,  
 Оёқларига ҳозир йиқилмоқ даркор!

## Оргон

Ҳа. Тўғри гап! Тиз чўқай мен бориб дарҳол,  
 Адолатинг — дегайман — кўрмасин завол.  
 Энг аввал шу бурчимни адо айлагум,  
 Қейин ўзга бурчга ҳам даво айлагум,  
 Яъни Мариана билан Валернинг тўйи!  
 Қовушгуси икки қалб то умр бўйи.

